

船山公年譜

船山公年譜後編

八世從孫之春

國朝康熙元年壬寅 公四十四歲

居敗葉廬聞明桂王被執續悲憤詩一百韻作長相思樂府

長相思樂府其一有云年華詎足惜腸斷受恩時其二有云他生就君結

詩有長相思樂府二首來日大難樂府二首爲宋子主人送高漸離入秦七絕一首迎秋五律八首詠史六絕

未注年分語  
意似今年作二十六首 五十自定稿

二年癸卯 公四十五歲

居敗葉廬三月看杜鵑花至鐵牆拗入王公愷六新莊  
爲和石灰泥壁讀金公堡前在靈谿洞所作遣興詩

夕堂戲墨卷二讀甘蔗生遣興詩次韻而和之今春  
看杜鵑花不覺到鐵牆拗王君延我入新齋爲他和  
石灰泥壁忽拈一帙沒其所自得教認取誰家筆仗  
卒讀久之乃知是者跋漢王君笑指石灰桶說尋常  
謂道人認得行貨今乃充此物經紀眯著眼看科斛  
耶是十三年前借山在靈谿洞所作 其三十二首  
有衛公乞打大臣袍句衛公注甘蔗生故字 己酉  
效柏梁體壽王愷六起云鐵牆拗頭綠鳳棲

夏六月次和金公堡遣興詩十五日爲之記 遣興詩

序於是次韻而和之不能寄甘蔗生也癸卯六月望  
茱萸塘漫記

廣遣興詩

詩序未注年月蓋亦是年所作故附於此

冬有疾

甲辰管大兄弓伯挽歌序有明文學管嗣箕弓伯以  
今癸卯冬卒於南嶽百丈山病乃使余有宿草而不  
得哭

詩有五言絕句三首

五十自定稿

讀甘蔗生遣興詩次韻而

和之七律三十首廣遣興詩七律三十首

遣興詩

三年甲辰 公四十六歲

居敗葉廬歐先生大生從遊門下

有又雪同歐子直詩 歐大生字子直衡陽人康熙  
中貢生沅湘耆舊集有傳

往哭管公嗣箕於其故居

管大兄弓伯挽歌序其明年姬六以亡託將改適返  
靈筵於高節里之故居乃申一慟良慨然矣

爲子旼娶文學近魯公女劉氏

生子五若茲蒼蘧萬女二

過小雲山下訪劉公近魯劉公導游小雲山嗣後歲一  
登之

小雲山記予自甲辰嗣後歲一登之不倦友人劉近  
魯居其下有高閣藏書六千餘卷導予游者

詩有感遇五古十一首寒日五律一首人日七律一首  
又雪同歐子直七律一首五日攜放兒同子直泊賢從  
哲仲小飲分得端字七律一首卽事有贈七律一首管  
大兄弓伯挽歌歌行二首

五十自定稿

四年乙巳 公四十七歲

居敗葉廬重訂讀書說

和梅花百詠詩序時方重訂讀書說

正月初七日龍公簡卿寄到洪公業嘉梅花百詠元稿  
讀之淚下

和梅花百詠詩序今歲人日得季霞伯兄簡卿寄到  
伯修元藥潛然讀已

十八十九日連夕和洪公業嘉梅花百詠詩

和梅花百詠詩序以示歐子直子直欣然屬和仍從  
與老漢爲前驅祓道又遂乘燈下兩夕了之

二十日序和梅花百詠詩

和梅花百詠詩序乙巳補天穿日茱萸塘記

拾遺記  
正月二

十日爲天穿日江東以紅樓  
繫煎餅置屋上名補天穿

長女孫生 適兵部尙書劉堯誨嗣孫克謹子法忠

三月初三日序瀟湘小八景詞

瀟湘怨詞序乙巳上巳茱萸塘記

過鐵牆拗王公愷六山莊看鳳仙花

有愷六鳳仙花盈畝聊題長句詩

夏遊大雲山妙峰菴

雲山妙峰菴云是申泰芝煉丹處詩有云首夏積翠  
鮮停午條風涼

秋八月登小雲山憩劉公近魯小軒圍碁倦罷讀王伯  
穀集和其梅花絕句十首

和梅花百詠詩附追和王伯穀梅花絕句十首敘乙  
巳中秋坐彭城君小軒奕倦茶闌索書以讀得百穀  
集就中梅花七絕十首尤爲清健因次其韻

詩有和陶停雲贈芋巖五十初度四言四首夏日端居  
五古一首雲山妙峰菴云是申泰芝煉丹處五古一首  
愷六種鳳仙花盈畝聊題長句五排一首人日新晴七



律一首秋雨同子直七律一首又雨七律一首夜七律

一首

五十自定稿

追和王伯穀梅花七言絕句十首

附和梅花百詠

後詩

五年丙午

公四十八歲

居敗葉廬春髮漸白

早春詩有誰道鬢添綠之句

詩有秋陰五古一首歐子直自南嶽返訊之五古一首

詠百合五絕一首結襪子五絕一首早春五律一首十

二月八夜看月五律一首初九夜再賦五律一首

五十

自定稿

六年丁未

公四十九歲

居敗葉廬春正月初一日過歐先生大生家園碁

有元日過子直奕詩

夏避暑王公愷六山莊

有避暑王愷六山莊會夕雨放歌歌行有雷聲昨夜  
疎星片片餘雲留岳足之句

秋九月李公跨鼇元配林孺人卒公往弔並卹其太孺  
人

故孝廉李一超以懷貞窮愁死不及有嗣息元配林  
孺人掖呬太孺人于痺病中十四年不舍榻右猝邁  
危疾臨終悲咽以不得躬親大事爲憾啼聲未絕而  
逝余于一超不淺視道路感泣者自踰涯量裁二詩

以將哀尤爲太孺人愍悼焉詩其一云轉轉金輪御  
朔風其二有云桂輪難滿月三秋

公與石崖公同被難劉公象賢居間得寢招遊虎塘爲  
序族譜會劉公六表初度公卽席爲子敵聘其女爲婦  
有劉若啟爲余兄弟排難已招泛虎塘敘其家乘會  
當六表悅辰歡讌之下遂允貺室于敵兒詩 蔚齋  
文集王江劉氏族譜序王將諸劉潛明經是玉氏湘  
孝廉若啟氏奉季昌先生之志修其家乘以示夫之  
而徵言焉 又夫之之舉于鄉也與若啟氏講以世石  
長氏偕以年而協以窀夫之伯兄旣與若啟氏講而  
遊辟廱之歲與季昌先生壽玉氏聲玉氏賜玉氏胥

以齒 劉象賢沅湘耆舊集傳字若啟湘鄉人崇禎  
壬午舉人鼎革後隱居深山著書以終 鼓棹二集  
有友人劉懿菴營虎塘頗勝沒後鞠爲茂草賦此寄  
歎昭君怨詞

詩有四言襍詩一首古意五古一首問芋巖疾五古一  
首正月十六夜重賦五律一首元日過子直奕七律一  
首故孝廉李一超以懷貞窮愁死不及有嗣息元配林  
孺人掖呬太孺人于痺病中十四年不舍榻右猝邁危  
疾臨終悲咽以不得躬親大事爲憾啼聲未絕而逝余  
于一超不淺視道路感泣者自逾涯量裁二詩以將哀  
尤爲太孺人愍悼焉七律二首劉若啟爲余兄弟排難

已招泛虎塘敘其家乘會當六帙悅辰歡讌之下遂允  
貺室于敵兒七律一首湖外遙懷些翁七律一首寄懷  
青原藥翁七律一首竹枝詞七絕十首忍俊七絕九首  
箜篌引樂府一首避暑王愷六山莊會夕雨放歌歌行  
一首 五十自定稿

七年戊申 公五十歲

居敗葉廬唐先生端笏遊於門下

與唐須竹夜話詩其一有九春初雨歇花屐不相期  
其二有鼎鼎千秋意勞勞夜雨傳六經誰楚漢云云  
唐端笏沅湘耆舊集傳字須竹一字躬園衡陽人

次女孫生

適文學熊榮祀子時幹字體貞

柳岸吟有  
讀易贈熊

體貞孫備  
詩八首

三月至湘鄉與李公國相同泛湄水

湄水月泛同芋巖詩有春盡試新晴句

夏六月留湘鄉與劉公象賢期徐公芳遊虎塘遲至公  
病遂先歸敗葉廬

有期徐蔚子虎塘遲至余暑病先歸蔚子獨留萬緣  
池與若啟月飲共相太息寄此謝之詩 徐芳沅湘  
耆舊集傳字蔚子本姓徐長沙人育於湘鄉簡氏故  
又從簡姓字在雍順治末歲貢官常德訓導有種竹  
亭稿王船山先生序行

秋七月成春秋家說望日壬子爲之序

春秋家說序迄今二十二載夫之行年五十悼手口

之澤空存念螻蛄之生無幾恐將失墜敬加詮次著

雖涓灘之歲相月壬子望不孝徵仕郎夫之述春秋世論

序著雖涓灘之歲相月望日壬子湘西草堂王夫之序案草堂成於乙卯本年戊申不應有湘西草堂之名著雖涓灘四字傳寫必有

譌誤然無從訂正姑附於此

詩有與唐須竹夜話五律一首始晴五律一首湄水月

泛同芋巖五律一首春日山居戲效松陵體七律六首

期徐蔚子虎塘遲至余暑病先歸蔚子獨留萬綠池與

若啟月飲共相太息寄此謝之七律一首答黃度長七

律一首得青原書七律一首些翁補山堂詩和者數十

人今春始枉寄次韻奉和並敬翁體歌行一首五十自定稿

八年己酉 公五十一歲

居敗葉廬輯戊子以來所作古近體詩爲五十自定稿  
五十自定稿五言古五言絕句五言近體七言近體  
七言絕句皆始於戊子餘始於己丑乙未乙巳

再繼娶張孺人

家譜三配張孺人生沒失記葬金蘭鄉姚家塘 因  
林塘小曲築草菴開南窗不知復幾年晏坐漫成詩  
其四有云釧聲原宿業崖蜜自先甘寓目團圞淺初  
心冷暖諳

孫夏生

庚戌哭殤孫詩注以大統厯立夏日名之曰夏其詩



有兩日朱明留不得句

與唐先生端笏同遊馭閣巖因留巖中爲之剖示學術源流

同唐須竹遊馭閣巖詩起云昨日初收梅雨天又有  
同須竹晏坐馭閣巖詩 沅湘耆舊集唐端笏傳引  
徐令素唐躬園墓誌躬園嘗得白沙集定山集傳習  
錄諸書讀之而嗜迎船山先生住馭閣巖爲剖示源  
流因知有朱陸異同及後來心學之誤 馭閣巖爲  
庚戌懷入山以來所棲伏林谷二十九首之一注右

湘西

秋與唐先生端笏同遊昭陽菴

有昭陽菴同須竹夜話云乘木葉秋波探五老之勝  
因便送之詩

至桃塢訪李公國相不遇

過芋巖不值詩有云晴稻收雲白秋瓜切粉黃

客朱王孫翠濤聽月樓已而歸山

聽月樓倦客歸山留別翠濤王孫詩有樓前湘水賦  
碧玉細細波紋送遠秋及黃菊將開酒將熟之句  
丙辰有中秋同聖功庶先翠濤須竹飲聽月樓諸公  
將送予下湘詩

九月初一日公五十齒滿劉公懿菴李公國相來祝  
有不揆五十齒滿懿菴見過留同芋巖小飲詩

和郭公都賢補山堂洞庭秋詩並爲之記

洞庭秋詩題注遙和補山堂作序己酉秋杪記

和八閩曉堂上人蘆雁絕句

鴈字詩後記題此經一年矣又庚戌秋冬之際敗葉

廬記

冬構草菴開南窗題曰觀生居石崖公來過

有因林塘小曲築草菴開南窗不知復幾年晏坐漫  
成六首呈桃塢老人石崖先生同作詩其一云暄風  
凌小雪當砌炫冬榮其五云病畏朔風寒南窗背嶺  
安 薑齋文集有南窗銘觀生居銘 湘西草堂虎  
止公記次築觀生居在茱萸塘上易以茅堵窗楹少

容几杖

編春秋左氏博議

因林塘小曲築草菴開南窗不知復幾年晏坐漫成  
六首其三有家學志春秋句

詩有過芋巖不值五律一首深秋望子直五律一首因  
林塘小曲築草菴開南窗不知復幾年晏坐漫成呈桃  
塢老人暨家兄石崖先生同作五律六首家兄觀夫之  
抄藁云墨跡似先徵君垂示以詩哀定後敬和四韻五  
律一首同唐須竹遊馭閣巖七律一首昭陽菴同須竹  
夜話云乘木葉秋波探五老之勝因便送之七律一首  
不揆五十齒滿懿菴見過留同芋巖小酌七律一首寄

和些翁補山堂詩已就聞翁返石門復次原韻寄意歌  
行一首粵奴初識雪歌歌行一首孤鴈行和李雨蒼歌  
行一首讀涇陽先生虞山書院語錄示唐須竹歌行一  
首聽月樓倦客歸山留別翠濤王孫歌行一首效柏梁  
體壽王愷六歌行一首六十自定稿大統厯閏臘七絕一首  
分體洞庭秋七律三十首洞庭秋詩題蘆鴈絕句七言十八  
首鴈字詩

九年庚戌 公五十二歲

居觀生居夏秋仍居敗葉廬歲以爲常

鴈字詩庚戌秋冬之際敗葉廬記 壬子有家兄期  
以中秋過敗葉廬會恙不果吟見懷念逾月小愈袖

詩下訪適當閨望是夕人閒謂爲中秋夜坐不復對  
月敬和來篇奉酬詩

三女生 適文學李報瓊子嚮明

三月孫夏殤

哭殤孫用羅文毅慰彭敷五喪子韻詩有兩日朱明  
留不得句

秋齒始落

齒落示敵子詩有云梧桐一葉已知秋塞角催霜幾  
耐愁

唐先生端笏從其兄端典以母氏蘇太君六十壽請侑  
辭公爲作孝壽說

蘇太君孝壽說庚戌之秋兩唐子爲其母氏六秩壽徵侑辭焉又非直以須竹之數與相遊也

有疾作前後鴈字詩附以舊作蘆鴈絕句並記

鴈字詩前鴈字詩十九首序不期病中忽有陽鳥筆陣如鳩摩羅什兩肩童子出現因吟十九首後鴈字詩十九首詩序嗣吟十九首首四十字

懷入山以來所棲伏林谷三百里中小有邱壑各述以詩得二十九首

公自注排子嶺獅子峯黑沙潭續窈菴雙髻峯黃沙潭溪波巖妙高峯車轍亭方廣路嘯臺補衲臺洗衲池右嶽後青谿石門西石門松紋石亭塢雲菴右祁

邵之閒釣竹源雲臺山注右零陵北洞西莊源小祇  
園右宜江小雲山昭陽菴馭閣巖桃塢雪竹山茱萸  
塘敗葉廬觀生居右湘西

作廣明大師小傳

薑齋文集梳銘跋新安黃將軍金臺披緇稱廣明大  
師請余爲小傳

銘筆硯墨祕閣硯蓋杖拂子圍碁梳南窗觀生居

薑齋文集硯銘跋庚寅冬桂林覆敗硯爲叛吏挾家  
人奪去旣返山無以和墨劉平思畀一石子外璞中  
膩參差類小龜卽非至者亦頗受墨相隨二十年矣  
詩有擬古五言十九首懷入山以來所棲伏林谷三百



里中小有邱壑輒暢然欣感各述以小詩得二十九首

五絕

六十自定稿

擬阮步兵詠懷八十二首

六十自定稿收二十四首編年

稿收五十八首

哭殤孫用羅文毅慰彭敷五喪子韻七律二首

齒落示敵子七絕一首今日漢宮人五律一首

編年前稿

鴈字詩五律十九首後鴈字詩五律十九首

鴈字詩

十年辛亥 公五十三歲

居觀生居夏秋仍居敗葉廬

複用瞿辛原體吟瀟湘夜雨洞庭秋月平沙落鴈遠浦  
歸帆漁村夕照山市晴嵐煙寺晚鐘江天暮雪大八景  
詞論瀟湘八景因作瀟湘怨一卷

瀟湘大八景詞序余歌小八景來十六年矣 又重吟

大八景詞複用瞿辛原體旌初志也 瀟湘怨詞後

增十景詞跋有云瀟湘八景不知始誰差遣惟洞庭

月瀟湘雨耳他皆江南五千里所普攝也 又瀟水出

自營浦西北流五百里而得湘湘水合興安之海陽

山與灘背流既合於瀟北流千二百里至巴陵大江

自西來注之瀟湘之名釋而從江此千五百里間穀

波繡壁楓岸荻洲清絕之名於斯遶矣蹟不勝探其

尤者得十景焉曰舜嶺雲峯曰香潭綠水曰朝陽旭

影曰浯溪蒼壁曰石鼓危崖曰嶽峰遠碧曰昭山孤

翠曰銅官戍火曰湘灣曲岸曰君山浮翠各題一詞

均寄調蝶戀花 又情物各有因緣歸宿不迷於萬古

視諸帆鴈嵐雪悠悠無擇地者不猶賢乎僕欲爲此  
詞不知何以未暇歌八景後驅筆獵之 舜嶺雲峰  
注瀟水自江華西北流至甯遠九疑山北疑峰恆有  
雲藏其半嶺飛雨流淙入瀟水中 香潭綠水注湘  
水徑東安縣東有沈香塘石壁罅插一株云是沈水  
香澄潭清冷綠蘿倒影 朝陽旭影注在零陵縣瀟  
水側去鉅鉚潭愚溪不遠北十里爲湘口是瀟湘合  
處 浯溪蒼壁注在祁陽縣元次山勒顏魯公中興  
頌於崖壁苔光水影靜目愉心 石鼓危崖注衡陽  
縣北二水匯流潭空崖古 嶽峰遠碧注自衡陽北  
三十里至湘潭六十里嶽峰淺碧宛轉入望 昭山

孤翠注一峰矗立江次北去湘潭三十里下爲暮雲

灘 銅官戍火注銅官浦在長沙北六十里

曾刻本  
講三

蘆汀遠岸水香生於始夜漁鐙戍火依微暮色閒如

寒星映水 湘灣曲岸注湘陰北三十六灣云是馬

殷所開縈回清澈出此卽漸入青草湖李賓之詩三

十六灣灣對灣者是也 君山浮黛注湖光極目至

君山始見一片青芙蓉浮玻瓈影上自此出洞庭與

江水合謝眺所云大江流日夜客心悲未央者於是

始矣湖南清絕亦於此竟焉

李公占解以王文恪公所撰其大父大崖先生墓誌銘

見寄讀竟書後返寄

薑齋文集讀李大崖先生墓誌銘書後先生裔孫雨  
蒼占解年七十三矣以王文恪公所撰墓誌銘寄唐  
生端笏使與夫之共讀謹誌其後以訊雨蒼當如面  
談矣 李雨蒼占解年七十三矣書至期游南嶽若  
必果者返寄遲望信宿詩有瀾瀾洞庭水迢迢諸葛  
臺及盈盈秋波生之句

方公以智屢勸逃禪公不應冬書所示劉安禮詩見寄  
極丸老人書所示劉安禮詩垂寄情見乎詞愚一往  
吃訥無以奉答聊次其韻述懷詩有云舊識五湖風  
月好寒梅春在野塘邊 南窗漫記方密之閣學逃  
禪潔已授覺浪記前主青原屢招余將有所授誦人

各有心之語以答之意乃愈迫書示吉水劉安禮詩  
以寓從臾之至余終不能從 劉安禮名仲錚吉水  
舉人隱於梅川附永〔歷〕實錄劉季鑛傳

十二月敏公子生蕃生 字懷姓行三邑文庠生

蘊齋詩賸稿有示姪孫生蕃五古

過雪竹山訪茹蘖大師留宿夜話

宿雪竹山同茹蘖大師夜話有煙籠雪壓一枝輕之  
句 辛酉廣哀詩雪竹山道者智需注字茹蘖昆明  
人本姓張以鄉舉任衡山令己未沒於嘉興之楊墳  
詩有偶望七律一首極丸老人書所示劉安禮詩垂寄  
情見乎詞愚一往吃訥無以奉答聊次其韻述懷七律

一首宿雪竹山同茹蘖大師夜話七律一首

六十自三  
定稿

月十一夜寥登天壽山五律一首月坐懷須竹南嶽五  
古一首李雨蒼年七十三矣書至期遊南嶽若必果者  
返寄馳望信宿五古一首

編年稿

十一年壬子 公五十四歲

居觀生居夏秋居敗葉廬

春同唐先生端笏往祝劉公近魯五十初度卽席賦詩  
劉庶僊五十初度卽席同唐須竹詩有云於君燒燭  
耐春寒

三月郭公都賢以文字坐繫沒於江陵公開遙哭

補山翁坐繫沒於江陵遙哭詩其二有幾間落花津

之句 南窗漫記丙戌屯師湖上未能前進一咫而  
賦歟之重十倍少司馬天門郭公都賢咏雪詩云四  
望郊寒連島瘦一天白起奈蕭何督使聞之怒甚嗾  
悍帥害之會潰敗不果公卒以文字取禍卒於江陵

### 游二中園

二中園紀事爲懿菴作詩其一有云穿花分柳逕隨  
蘇度蘭風

### 四女生 字唐端笏子常適字無適戊午天

薑齋文集唐子無適墓表湘西學者唐常適字無適  
年十八歿其父躬園子悼之不欲生又無適凡兩納  
采皆未成禮其一先者予少女也亦謹慧七歲而天



七月十六日長孫生若生字以似號竹溪府學歲貢

生候選訓導

八月石崖公將來敗葉廬有疾不果逾月小愈始來

有家兄期以中秋過敗葉廬會恙不果吟見懷念逾月小愈袖詩下訪適當閨望是夕人閒謂爲中秋夜坐不復對月敬和來篇奉酬詩

方公以智卒於泰和蕭氏公聞哭之

聞極丸老人凶問不禁狂哭痛定輒吟二章詩其一云敗葉雲中哭杜鵑其二云五湖煙水一霜林注傳聞薨於泰和蕭氏浮春園廣哀詩青原極丸老人前大學士方公以智注字密之桐城人國亡披緇稱

愚者智字無可一號墨歷壬子卒於泰和

得唐先生端笏鄂中書知李公占解卒於魚山遙哭之  
得須竹鄂渚信知李雨蒼長逝遙望魚山哭之詩其  
二有剛遣西風吹片葉其三有柳岸霜風月已殘之  
句 南窗漫記嘉魚李雨蒼占解己酉寄余此詩云  
欲涉湖相訪時年七十矣閱兩歲遂長逝不果所至  
詩有二中園紀事爲懿菴作五律二首劉庶僊五十初  
度卽席同唐須竹七律二首聞極九翁凶問不禁狂哭  
痛定輒吟二章七律冬夕七律二首蚤春七絕二首得  
須竹鄂渚信知李雨蒼長逝遙望魚山哭之七絕二首  
六十自定稿上已五古一首春晴七律二首家兄期以中秋

過敗葉廬會恙不果吟見懷念逾月小愈袖詩下訪適  
當閨望是夕人閒謂爲中秋夜坐不復對月敬和來篇  
奉酬七古一首補山翁坐繫沒於江陵遙哭五律一首

編年稿

十二年癸丑 公五十五歲

居觀生居

三月唐公克峻六十齒滿爲文壽之

薑齋文集補遺有唐欽文六秩壽言 唐欽文墓誌

銘距生之年萬厯癸丑季春月十九日 辛酉廣哀

詩唐處士克峻注字欽文己未沒

秋七月與唐先生端笏及其兄端典同遊鍾武故城

有新秋同唐古遺須竹遊鍾武故城歸坐小軒夜話  
詩 鍾武漢書地里志屬零陵郡芥曰鍾桓應劭曰  
今重安 故城在衡陽縣西八十里

冬有疾

有家兄小築耐園俯用夫之觀生居韻病不能爲偶  
句放時體疊前韻奉和詩

十二月公疾未愈

有歲晚養病詩

詩有卽事五律一首晴步五律一首詠菊答須竹排律  
一首新秋同唐古遺須竹遊鍾武故城歸坐小軒夜話  
七絕一首詠雪七律一首

六十自定稿

期須竹五古一首家

兄小築耐園俯用夫之觀生居韻病不能爲偶句放時  
體疊前韻奉和五古六首歲晚養疴五古五首李供奉  
集有笑矣乎悲來乎二歌識者知爲齊已贗作辭翰舛  
滯旣良然矣亦繇無情而氣矜如捫天求月天不可捫  
月況可得若僕今者可以笑未其悲則已夙矣因爲補  
之歌行二首

編年稿

十三年甲寅 公五十六歲

正月吳逆三桂僞檄至衡州

公至湘鄉

上湘旅興詩有寒山猶半綠習習江南暖幾葉帶疏  
黃諸句 湘西草堂記因避滇氛泛宅數載

二月吳逆兵陷常德岳州長寶衡永郴桂相繼淪陷  
三月與唐先生端笏泛舟至郡

舟中上已同須竹詩有心湯如何之句

### 游伊山

伊山詩其一有雲煙開綠畝金碧動青林之句 伊  
山在衡陽縣北三十里晉桓伊讀書處一名桓伊山  
秋與唐先生端笏渡洞庭阻風青草湖

青草湖風泊同須竹與黃生看遠汀落鴈詩有珍重  
羽衣涼仙桂綴蟾光神帶九秋霜回翔豈稻梁浣紗  
人伫久息機非倦止諸句

公有疾寓僧寺安遠靖寇大將軍多羅貝勒公尙善遣

都統劉公省問

安遠公所遣都護劉君過寓存問詩以贈之詩有佛  
燈灼灼茶碗清及秋風颭颭蘆花蒼蘆花如雪寒溪  
長之句

送蒙公正發先還故山

送蒙聖功暫還故山詩有秋風淫淫吹我衣涼日當  
襟返翠微青山料理勿取次留之待我慰調飢諸句  
冬歸

衡山曉發詩其一有擊楫遲楓浦歸心就翠微其二  
有綠潤不知冬嶽雲第幾峰之句

詩有上湘旅興五律五首舟中上巳同須竹五律一首

伊山五律二首衡山曉發五律二首陳耳臣老矣新詩  
猶麗遠寄題雪諸詠隨意和之五律四首青草湖風泊  
同須竹與黃生看遠汀落鴈五排一首送蒙聖功暫還  
故山七律一首五十自定稿安遠公所遣都護劉君過寓菴  
問病詩以贈之七古一首贈俞西巖誰園五古一首編年  
稿寄懷陳耳臣兼懷安福陳二止七律一首薑齋詩賸稿未注年  
分因本年有和陳耳臣詩附題於此

陳二止名觀安福舉人甘貧砥節吉安失守與妻子  
訣寓食攸縣山寺粗糲不給或飲水以終日附永厯  
實錄劉季鏞傳

十四年乙卯 公五十七歲



公寓郡城北旃檀林戴先生日煥來謁

戊戌嶽後戴晉元來訪今來復連榻旃檀口占詩有  
荏苒十八年夢中時一遇及同君宿郊庵四目還相  
注之句 旃檀林在郡城北二里

二月至長沙

長沙旅興詩有樓船擬趁桃花水句

舟泊水綠洲遇劉先生思肯過舟爲公寫小照

走筆贈劉生思肯詩云故園枝葉記君家兄弟風流

競筆花汎宅五湖君自遠相逢猶幸在長沙 又水綠

洲前魚艇多也來相伴曬漁蓑逢君翦燭當深夜奈

此干戈滿地何 又老覺形容漸不眞鏡中身似夢中

身憑君寫取千莖雪猶是先朝未死人

舟泊湘陰追哭故明大學士華亭伯章文毅公曠

有三十六灣初見新綠詩夜泊湘陰追哭大學士華  
亭伯章文毅公詩

渡洞庭湖至於岳陽

湖水詩有湖水春山盡巴邱戰壘春及天涯同一寄  
未必故園親之句

三月歸至長沙拜故明蔡忠烈公道憲祠

長沙旅興詩有漁舟初繞碧波勻及隨處桃花可問  
津句 蔡公祠詩有綠莎生庭際春雲相濺喧句  
分體稿送須竹之長沙七律其二有江門曾薦瓣香

哀句注江門蔡公別號祠在城西

還郡董公達偕章文毅公子有謨由粵西還華亭道阻不得歸公遇之延入旅舍遂與唐先生端笏同遊門下受公所注禮記

行述時華亭章司馬次子有謨南遊阻道府君延入晝共食蕨夜共然藜以所注禮記授之夜談至雞鳴爲常遊兵之爲盜者竊聽而異之相戒無犯焉沅湘耆舊集引徐令素唐躬園墓誌滇師抗命之年章公子載謀有謨遊粵西不歸因遊於船山之門而問禮旦夕與躬園偕沅湘耆舊集載虎止公贈董達五古題云董公達年八十矣以章大司馬祠碑及

陳烈婦碑文遠來相訪並示以載謀公子及公孫近  
札遣使入山道繣綌之意以期一晤作五言長詩答  
之詩云憶昔弱冠時逢翁戎馬閒言偕章公子避地  
入寒山先君稱執友往事述仁賢丞相迴落日桑榆  
摧霜寒翁爲門下士鋒矢護完棺秉彝有同心言返  
吳江攢翁志旣已酬薄遊俠士壇俠士葬郊隣烈女  
悲貞鸞上湘陳宜人抱志沒漣湍至德必有鄰水怪  
匿神姦洲擁烈婦墳波激壯士肝鄧氏顯鶴曰章文毅曠卒於永州陳夫人其妾陳氏也有武人要之陳赴水死湘人葬之漣溪東岸大水衝齧溪岸墓獨無恙昭山詩  
有深春花欲紅句 己未送章載謀歸吳淞詩有相  
逢及送別都在落花時句

四月初五日次孫生茲生 放公次子字允在號佚菴

六月與李公緩山章先生有謨同登回鴈峰

與李緩山章載謀同登回鴈峰次緩山韻詩有云小  
有綠陰堪避暑相看枯木不驚雷

秋七月出郡城赴李公緩山之約

出郭赴李緩山之約至桓伊山下遇雨詩有葛衣疏  
透雨珠閒習習輕風宿暑闌之句

八月與蒙公正發同赴江西至於萍鄉

萍鄉中秋同聖功對月詩有白頭還作他鄉客及自  
笑漁樵非汎宅之句

九月歸自江西舟行至湘潭阻風訪明將張公永明弔

其灘江殉難烈姬孫氏呂氏

風泊中湘訪張永明老將弔孫呂二姬死讀辛卯以  
來諸公獎貞之篇放歌以言情孫呂事詳故中舍管  
公記詩云昭潭萬波疊霜縠南望灘江暮雲綠驚鴻  
叫雲天不開秋夕孤飛遙痛哭二十六年春蔓長我  
與張君四鬢霜衰顏不死猶前日湘女空靈鬱渺茫  
茫茫峒雲結煙草貞魂不舍蒼梧道哀歌血淚灑青  
天管子嗣裘金郎堡而我悲吟獨待今二十六年埋  
愁心左掖蒙生俱未死軍中彈淚秋陰深嗚呼乎往  
恨迷離無再說一死人閒萬事決君不見張君三婦  
灘江濱俄頃千秋如截鐵 灘江在廣西桂林府城

東南

過湘鄉東臺山

東臺山詩有百里初見山西暉客望閑及半峰明紫  
樹漁舟隔浦還諸句 東臺山在湘鄉縣東十里一  
名鳳凰山一名望嶽峰南連華蓋下瞰漣水

還觀生居於相去二里許石船山下仍里人舊址築草  
堂成徙而居之

船山記顧於此閱寒暑者十有七辛未深秋記 草  
堂成詩有歸舟湘水北伐木建秋清南窗仍夕暖冬  
嶺迓春晴諸句 湘西草堂記先子船山記曰船山  
者吾山也故今之記湘西草堂亦謹記之曰湘西草

堂者先子之草堂也先子自前崇禎癸未張獻忠陷衡後湘嶽之間三十餘年□□踵接終全志節閉門謨著迄歲庚子乃徙居於湘西之金蘭鄉卜舍於茱萸堂初造小室名之曰敗葉廬蓬簷竹牖植木九柱編篋爲壁次築觀生居在茱萸堂上易以茅堵窗櫺少容几杖越十二年再徙於石船山下去觀生居二里許仍里人舊址築湘西草堂因避溟氛泛宅數載後復歸草堂定經詮秩散稿輯閒吟而先子奄背敵謹固遺書於屋右个而火災蟻蝕之害其震驚慌惕不一次也因聚徒課業於其中迄敵年六十從遊者數十人醵金爲余壽余受其金授子堦曾生重建草



堂易瓦以葺支椽以櫨鍊磚以砌敵年老病羸以餘年讀遺書其中而從遊之有志迄姻友之有力者續捐貲刊先子遺書數種藏板於右閣敵手植刺松側柏紅梅碧桃等樹成蔭篋簞幽篁成林而草堂益爲都里所共式逮敵年七十諸生復醵金如舊爲余刊小草百篇小草者先後所成時藝此不足傳而愚之不却者亦以諸君始終培植草堂之意不可忘也余嘗至黃州見王公禹偁所作記之竹樓今千餘年矣仍巋然一竹樓豈有此不蛀不壞之竹樓乎亦存乎人心之不沒不朽而已故舉一竹樓而其他爲名賢之遺蹟不可勝舉豈非人有同情有陶令之吾愛吾

廬而人亦愛其屋耶但念徐文長詩云庭前幾筆青  
青草禁得倪們幾斧斤今敵七十有五矣盼新竹之  
娟娟而恐放其良心者亦如牛山之旦旦而召斧斤  
也援毫爲文付諸子孫讀之者當如讀鳴鳩而三復  
也是爲記

詩有昭山五絕二首東臺山五律一首草堂成五律一  
首殘雪七律四首長沙旅興七律一首郡歸書懷寄懿  
菴七律一首出郭赴李緩山之約桓伊山下遇雨七律  
一首萍鄉中秋同聖功對月七律一首水口道中七絕  
一首走筆贈劉生思肯七絕三首題林良枯木寒鴉圖  
圖有李賓之題句七絕四首風泊中湘訪張永明老將

弔孫呂二姬死讀辛卯以來諸公獎貞之篇孫呂事詳  
故中舍管公記歌行一首石流篇樂府一首雉子遊原  
澤篇樂府一首門有車馬客樂府一首夜坐吟樂府一  
首豫章行樂府一首順東西門行樂府一首猛虎行樂  
府一首短歌行樂府一首六十自定稿長沙旅興七律一首  
江春望落日五古一首三十六灣初見新綠五古一首  
夜泊湘陰追哭大學士華亭伯章文毅公七律一首湖  
水五律一首贈程奕先五古一首三月七日所聞七律  
一首詩云天龍帝子知誰在今日生聞喜欲狂淮泗補  
天功造化蒼梧扶鼎治衣裳彤雲日角傳龍種元  
霧雲龍養豹章車遣孤臣情拜蔡公祠五古一首次李  
雪簪萍蹤萬一問津航  
緩山見寄韻卽用其體書懷馳答五古一首和程奕先

長沙懷古五古三首觀漲五古一首與李緩山載謀同  
登回鴈峰次緩山韻七律一首淶湘雜興五古六首萍  
鄉中秋同蒙聖功看月七律一首留別聖功七律一首  
代出自薊北門樂府一首卻東西門行樂府一首稿年  
戊戌嶽後戴晉元來訪今來復連榻旃檀口占五古一  
首蓋齋詩賸稿

十五年丙辰 公五十八歲

居湘西草堂章先生有謨留從門下

春夕同載謀看月詩有草堂新築延新月及湘山布  
穀未催耕之句

二月吳逆僞將引萍鄉敗兵趣湘潭擾茶陵攸縣

夏公渡湘至斗嶺

雨中過蒙聖功斗嶺詩其五有云東行渡湘水碧湧  
萬重蓮 斗嶺在衡州府城東二十里

秋七月在草堂

有早起草堂寓目牽牛花追憶懿菴詩

八月下湘將至長沙十五日夕蒙公正發劉公近魯朱  
王孫翠濤唐先生端笏餞飲聽月樓

中秋同聖功庶先翠濤須竹飲聽月樓諸公將送予  
下湘詩起云今宵猶對家山月江閣同傾送遠杯

舟中有疾

風泊昭山夾病中放歌詩有云老病煎肌秋夜淺及

荻葉敲蓬驚夢轉

九月留長沙十月至湘鄉補祝劉公懿菴七十初度

懿菴七十初度余留滯長沙不遂山中歡笑已乃泝  
漣訪祝述懷詩有黃潤沐霜液菊樽開已緩杞實猶  
堪摘諸句

十一月吳逆據衡州

始撰周易大象解

周易內傳發例丙辰始爲大象解

詩有早起草堂寓目牽牛花追憶懿菴五律一首春夕

同載謀看月七律一首先秋一日作七律一首

五十自定稿

人日有寄七律一首雨中過蒙聖功斗嶺五絕六首中

秋同聖功庶僊翠濤須竹飲聽月樓諸公將送予下湘  
七律一首風泊昭山夾病中放歌七古一首漣江夕泛  
五古一首褚公池五古一首懿菴七十初度余留滯長  
沙不遂山中歡笑已乃泝漣訪祝述懷五古一首楠園  
翠濤諸公作瓶菊詩命僕和作五律四首

編年稿

褚公池唐褚遂良爲潭州都督行部湘鄉賦詩處

十六年丁巳 公五十九歲

居湘西草堂

春乘小舟至郡登回鴈峰

重登回鴈峰詩有朱蕙如寢迷雙岸綠草當春覆一  
邱及漁舟戰鼓皆今日慙媿乾坤一影浮諸句

二月

大兵至長沙吳逆由常德迎戰敗走衡州

秋七月禮記章句四十九卷成

新秋望載謀詩其一注時載謀授館於翠濤其二周秦焚後字句注時禮注方竟

桐城余兼尊來訪

桐城余兼尊昔爲青原侍者歸素以來崎嶇嶺外相值見訪爲錄前寄極丸老人詩仍次原韻贈之詩有秋聲不斷有蟬吟之句

詩有新秋望載謀五律二首重登回鴈峰七律一首遣懷七律四首桐城余兼尊昔爲青原侍者歸素以來崎



嶠嶺外相值見訪爲錄前寄極丸老人詩仍次原韻贈之七律一首筌篈引樂府一首 七十自定稿

十七年戊午 公六十歲

居湘西草堂

閏三月吳逆僭號衡州其黨以勸進表來屬公婉詞拒之逃入深山作祓禊賦

行述維時長嘯一室作祓禊賦 潘撰傳戊午春吳

逆僭號於衡陽僞僚有以勸進表屬先生者先生曰某本亡國遺臣鼎革以來久逋於世今汝亦安用此不祥之人爲遂逃之深山作祓禊賦 沅湘耆舊集小傳康熙初吳逆僭號於衡僞僚有以勸進表屬者

先生曰某本亡國遺臣所欠一死耳今亦安用此不  
祥之人哉遂逃入深山作祓禊賦 賦曰謂今日兮  
令辰翔芳皋兮蘭津羌有事兮江干疇憑茲兮不歡  
思芳春兮迢遙誰與娛兮今朝意不屬兮情不生子  
躊躇兮倚空山而蕭清闌山中兮無人蹇誰將兮望  
春

三月初四日三孫生蒼生 放公三子字籀文邑庠生

冊名文園

秋八月吳逆死

大兵進規衡州

四女夭葬敗葉廬左梅側

梅陰塚詩序船山老人幼女七歲許字友人唐君之子者以戊午八月夭敗葉廬左有梅一株老人所翫息廬圯梅存因瘞其側老人女蚤曉字動有閑則嘗自言使我且死必不亂垂亡果然老人哀之甚且恐此土爲樵犁所侵詩以誌之 唐君卽須竹先生子名常適字無適薑齋文集補遺有唐子無適墓誌

九月初一日公六十初度徐公芳以松杖朱履青袍竹扇寄壽公作啟答謝

六十初度答徐蔚子啟指青松以似我五大夫閱世空悲進赤舄以邀遊幾輻屨今生更著青袍無煩嚴武用支肺病之寒湘簑不拂元規持卻熱中之暑

冬與唐先生端笏會葬李公國相歸乘小艇泝湘至郡  
同須竹送芋巖歸寔竟小艇泝湘轉郡城詩其一有  
飄零人在釣魚船其二有寒灰墜地皆千載及孤山  
錯擬萬株梅諸句

詩有寄徐蔚子五律一首小樓雨枕七律四首春山漫  
興七律七首同須竹送芋巖歸寔竟小艇泝湘轉郡城  
七律二首戲作七夕詞七絕三首梅花七絕四首梅陰  
塚歌行一首 六十自定稿

十八年己未 公六十一歲

居湘西草堂

二月

大兵復衡州

公與章先生有謨避兵檀林山中著莊子通

避亂石雞村同載謀小憩詩其一有云桃花影外天  
微波動新綠 莊子通序己未春避兵檀林山中磨  
席之室也衆籟不喧枯坐得以自念念予以不能言  
之心行乎不相涉之世浮沈其側者五年弗獲已所  
以應之者薄似莊生之術得無大疚媿然而予固非  
莊生之徒也有所不可兩行不容出乎此因而通  
之可以與心理不背顏淵蘧伯玉葉公之行叔山無  
指哀駘它之貌凡以通吾心也 又凡生生之說皆可  
因以通君子之道類如此故不問莊生之能及此與

否而可以成其一說

還湘西草堂定經詮秩散稿輯閒吟

湘西草堂記後復歸湘西草堂定經詮秩散稿輯閒吟

過觀生居見壁粘比歲人士酬贈韻語盡爲寓人擲棄  
惟陳公五鼎二箋僅存因和其詠木魚詩二章

詠木魚引觀生居壁粘比歲人士酬贈韻語時復迎  
目如相揚摧僕與當世偶一往還觴詠耳亦不可不  
容志之兵警後爲俗惡寓人盡擲棄之非有長吉睚  
眦之怨浪施和仲箋云之懼能使人不氣盡耶唯攸  
縣陳耳臣二箋僅存裴回不忍捨目用覺其詠木魚

詩未當作者輒和二章不能寄耳臣差賢於存沒諸公之逢蠹蟹無從靜對耳其二有馴鴿依簷春雨靜之句

章先生有謨辭還吳淞

送章載謀歸吳淞詩有云相逢及送別都在落花時

六月序莊子通

莊子通序是歲伏日南嶽賈薑翁自序

秋聞蒙公正發訃賦詩挽之

聞聖功訃遽賦詩有云回首故人無及籐花開獨坐

蘿月照霜鬚諸句

十二月爲唐公克峻作墓誌銘

蘊齋文集補遺文學孝亮翁欽文墓誌銘歲在己未  
仲冬月二十一日辰時翁坐而逝又以是歲季冬月  
壬申葬

詩有避亂石雞村同載謀小憩五絕四首送載謀歸吳

淞五律二首聞聖功訃遽賦五律一首詠木魚七律二

首六十自定稿柳岸吟一卷六十自定稿序此十年中別有柳岸吟云云究莫定爲何年所

作姑附於此

十九年庚申 公六十二歲

居湘西草堂唐先生如心來遊門下

唐如心見過詩有春草初生雪霰零及憐君問禮當  
深夜諸句 沅湘耆舊集有虎止公夏杪過擷翠堂



有作贈主人唐如心五律二首

爲子敬娶湘鄉象賢公女劉氏 生子生范

輯己酉庚戌以來所作古近體詩爲六十自定稿三月初三日爲之序

六十自定稿五言近體七言近體歌行始己酉五言古五言絕句始庚戌七言絕句始壬子排律始癸丑樂府始乙卯 六十自定稿序庚申上巳湘西草堂記

作瓶中句藥排律示諸門人

有見諸生咏瓶中句藥聊爲儷句示之排律

夏四月扶病過李公爲好山居信宿乃歸

過李爲好山居信宿詩其一有紫雪桐花落綠煙莎  
草凝及薄筵暑風勝淹留春病減諸句

鼓棹初集有壽李爲好瑞鶴仙詞爲好送魚苗謝之  
漁家傲詞各一闕

秋作螳螂賦

蠶齋文集螳螂賦題注庚申賦云維時靈雨旣降秋  
風載清

九月初四日四孫生還生 放公四子字內榮號庸菴  
邑庠生冊名大澗

詩有翠濤攜諸子遊瞻雲閣五古一首過李爲好山居  
信宿五律二首伏日五律一首臘月一日寒雪有作五

律一首見諸生咏瓶中句藥聊爲儷句示之排律一首

唐如心見過七律二首

七十自定稿

始春試筆五律四首不

雨五律一首後不雨五律一首重挽聖功五律一首李

叔晦秋信云同周令公來訪未果五律一首題翠濤新

築五律四首

分體稿

周令公沅湘耆舊集傳名士儀號藿園鄙人崇禎中  
拔貢遭世亂不仕閑戶著書作史貫十卷野獲編若  
千卷書成挾之遊徧燕齊吳越諸名勝所至皆有題  
詠有邁秋吟感杭遊雜詠南行句紀諸集

二十年辛酉 公六十三歲

居湘西草堂正月十五日夜看月

元夕詩有望月鈴牋出淺霞句

三女孫生 敵公出適邵陽文學羅珪子智文

三月有疾

將夕詩有餘春矜斷雨及藥市虛城郭句復病詩有  
消病一春長句

夏復病

復病詩有侵尋看柳絮句

五月十二日石崖公會孫永綿生 生祁公長子字猷

思邑庠生

作詩示劉李二生

示劉李二生詩有黃梅何日熟句 鼓棹二集有病

中興劉李二生夜話攤破浣溪紗詞又問劉存孺索

香橙清平樂詞鼓棹初集有與李治君夜話致身

錄事有感而作踏莎行詞有他年莫問草堂荒句乙丑有送

劉生輯夏歸省重慶詩武夷府君行述門下後學

邵陽劉永治填諱案公集劉李二生凡兩見皆未署名字故附錄劉李四君於此備考

追悼熊公秉文公之勇章公曠夏公汝弼瞿公式耜嚴

公起恆管公嗣襄李公跨鼇歐陽公惺南嶽僧信翰鄭

公顯祖管公嗣箕劉公惟贊方公以智劉公象賢李公

國相雪竹山道者智需蒙公正發唐公克峻爲廣哀詩

### 十九首

廣哀詩題注辛酉序云追平生交游凋替之類仍老

棲巖谷唯病相耦而已又抑此但述哀情不以隱顯  
爲先後因長逝之歲月序之杜陵八哀詩竊嘗病其  
破蘇李陶謝之體今乃知悲吟不暇爲工有如此者  
熊文學秉注字渭公黃岡人癸未武昌陷赴通山王  
府蓮池死文明經之勇注字小勇丁亥藍山遇亂  
兵死大學士章公曠注字于野號莪山華亭人贈  
華亭伯諡文毅丁亥死事於永州夏孝廉汝弼注  
字叔直己丑避甯遠山中憂憤而卒太傅瞿公式  
耜注字在田號稼軒常熟人庚寅留守桂林城陷死  
之少傅嚴公起恆注字秋冶山陰人寓籍眞定辛  
卯以抗孫可望被害管中翰嗣表注字冶仲說李

定國迎蹕拒孫可望不果甲午遇害於永安州 李

孝廉跨黿注字一超避山中甲午

原作乙未譌

卒

歐陽

文學惺注字叔敬於予爲中表兄弟少予二歲丙申

溺湘水

南嶽僧性翰注丙申沒

鄭生顯祖注字

忝生襄陽冢宰公繼之之曾

依續哀雨詩跋補

從孫予內弟

也從予學略成文章庚子夭

管文學嗣箕注字弓

伯甲辰沒

劉孝廉惟贊注字子參祁陽人避隱山

中丙午告終

青原極丸老人前大學士方公以智

注字密之桐城人國亡披緇稱愚者智字無可一號

墨厯壬子卒於泰和

劉孝廉象賢注字若啟湘鄉

人丁巳沒

李孝廉國相注字敬公避隱桃塢戊午

告終 雪竹山道者智需注字茹葉昆明人本姓張  
以鄉舉任衡山令己未沒於嘉興之楊墳 蒙諫議  
正發注字聖功崇陽人己未沒 唐處士克峻注字  
欽文己未沒

秋八月十五日向夕自觀生居步歸

有中秋向夕自觀生居同劉生步歸草堂詩

爲先開上人訂相宗絡索

南天窩授竹影題用徐天池香煙韻詩其三有微涼  
羽扇頻搖曳其七有高秋已瘦餘清泚句其六注時  
爲先開訂相宗

爲及門諸子說莊子



南天窩授竹影題用徐天池香煙韻詩其六注並與  
諸子論莊

詩有春盡有會而作五古一首始冬寓目五古一首將  
夕五律一首復病五律一首示劉李二生五律一首得  
嘉魚李西華兄弟書追憶雨蒼五律一首中秋向夕自  
觀生居同劉生小步歸艸堂月上五律二首元夕七律  
一首春興七律三首南天窩授竹影題用徐天池香煙  
韻七律六首春月歌歌行一首來者之曰歌歌行一首  
七十自定稿 廣哀五古十九首後廟蘇行歌行一首 分體稿

二十一年壬戌 公六十四歲

居湘西草堂正月送李先生治尹遊邵陽

有治尹始春爲邵陽遊有贈詩

省石崖公長夏菴

有春初雨歇省家兄長夏菴詩

五月五日同劉蒙二生小飲

有五日同劉蒙二生小飲詩

悼萬峰韜長老

萬峰韜長老去年寄書有不願成佛願見船山之語

聞其長逝作此悼之詩有瞿塘煙棹在涑水接湘川

之句

案瞿塘峽在四川夔州府涑水出鄰縣流經茶陵至攸與攸水合蓋蜀人住持於鄰茶攸三縣

開之山寺

六月疾病

有當暑沈疴詩

秋七月熊公男公來訪爲公療病愈

熊男公過訪詩有遙山清露滌木末素月上及烟炯  
河鼓星迢迢天漢廣之句 丙寅述病枕憶得今年  
病垂死得友人熊男公療之而蘇 鼓棹初集有過  
熊男公夜話浣溪紗詞

九月乙巳朔識說文廣義

說文廣義發例歲在壬戌季秋月乙巳朔船山老農  
識

十月甲戌朔識噩夢

噩夢序元默閣茂之歲陽月朔旦甲戌船山遺老識

十一月復病至十二月未愈

偶成詩有久病春難待及雪瓦封鐙暗之句

詩有和周履道對春雪五古一首和高季迪風雨五古  
一首春初雨歇省家兄長夏菴□□□□中惘然有  
作五古六首熊男公過訪五古一首偶題五律一首十七  
自定稿忽憶五律二首治尹始春爲邵陽遊有贈五律一  
首剖香櫟感恨五律二首六月二十二日五律一首五  
日同劉蒙兩生小飲五律一首萬峰韜長老去年寄書  
有不願成佛願見船山之語聞其長逝作此悼之五律  
一首當暑沈疴五律二首偶成五律二首夜七律一首  
懷須竹七律一首後行路難歌行一首東飛伯勞歌

行一首 分體稿

二十二年癸亥 公六十五歲

居湘西草堂春正月甲辰朔序經義

經義序癸亥孟春甲辰朔王夫之記

十三日五孫生范生 敬公長子字復濱

秋八月有疾

有八月初六夜病不得寐有會而作詩

過先開上人精舍看丹桂

有先開移丹桂一株於窗下作供爲賦十六韻詩起  
云靜館香成界空林影結鄰結云赤旃檀蔭合誰道  
苾芻貧

九月初九日同熊公男公與中涵存孺于禮諸先生集別峰菴二如精舍公越日歸

有九日同熊男公與中涵存孺于禮集二如精舍詩寒雨歸自別峰菴寄同遊諸子詩有霜磬警昨清之句戊辰有別峰菴二如表長老類知余者對衆大言天下無和嶠之癖者惟船山一漢媿不克任而表師志趣於此徵矣就彼法中得坐脫其宜也詩以悼之七律

案中涵集中不再見鼓棹二集有問劉存侯天覆吾歌廣其意  
篇索香橙詞甲子有待于禮詩又做李鄭  
示于禮附此備考

冬十一月述武夷公行狀

薑齋文集補遺武夷府君行狀歲在癸亥仲冬不孝

季男夫之狀 家譜譚太孺人行狀不孝夫之既受  
命於介之述先君子狀 又先君子几筵方徹太孺人  
遽罹終天之慘痛抑三十有四年矣

述譚太孺人行狀

薑齋文集補遺譚太孺人行狀歲在癸亥仲冬月不

孝男王夫之泣血狀

案家譜無月日曾刻本同備  
遺有月日而字句多異俟考

爲李公國相訂定遺稿

有爲芋巖定遺稿感賦詩 南窗漫記芋巖李敬公

國相遺稿屬余訂定今錄其佳句云云

得安成劉公敕功書知舉主歐陽公霖已卒於庚申賦  
詩將哀

有得安成劉敕功書知舉主黃門歐陽公盜逝三年  
矣賦哀詩 春秋家說序進業於安成劉氏

詩有寒雨歸自別峰菴寄同遊諸子五古一首人日五  
律一首初秋五律三首先開移丹桂一株於窗下作供  
爲賦十六韻排律一首詠風戲作豔體排律一首

七十  
自定

稿田家始春雜興五古三首夕涼五古二首遊仙詩五  
古八首連雨言情七律一首九日同熊男公與中涵存  
禮于孺集二如精舍七律二首病七律三首爲芋巖定  
遺稿感賦七律二首八月初六夜病不得寐有會而作  
七律一首得安成劉敕功書知舉主黃門歐陽公盜逝  
已三年矣賦哀七律四首七言絕句八首香櫟七絕一



首遣病七絕八首桃花流水引七絕六首諸皋七絕三  
首讀碧雲集感賦七絕三首

分體稿

二十三年甲子 公六十六歲

居湘西草堂春正月病

客至詩有病眼忘春賞芳辰競客遊之句

因松江董公斯行請竟陵吳公既閑撰武夷公暨譚太  
孺人墓誌銘

病起連雨詩注春初因松江董斯行請誌銘於竟陵

吳既閑 董斯行疑卽董達

銘卒未至  
增誌於此

三月猶病徐公合素以書自郡城來訊

徐合素自南來抵郡城遠訊船山代書答之尊世父

閣公從海上卒於嶺表廿餘年矣因寓我尙爲人之  
歎詩有梅霖風困藥礪煙及歸舟知汎桃花水句

夏四月扶病理故人書來

初夏詩有病骨喜衣輕藥裹蟲絲剔及故人縑素在  
裝裹趁初晴諸句

五月初四日夕扶病讀唐先生如心近詩口占寄意  
有五日前一夕唐如心以近詩見問病廢夜讀久矣  
卽夕口占寄意詩

初五日作俟解題詞

俟解題詞甲子重午船山病筆

秋七月疾愈

瓜圃夕涼詩有初螢明青蚰樾徑珠露泫緒風愜涼襟披衣視霄漢諸句

冬十月朔復病連雨不得省墓復待吳公既閑所撰誌銘不至爲之痛哭

病起連雨詩其一有風定小容秋葉緩及黃橙丹柏看冬榮其二有寒衣姑緩待霜威其四有潛聖峯雲碧萬層及扶病今生夢一登諸句自注云病不得省墓春初因松江董斯行請誌銘于竟陵吳既閑期以秋至不得垂死病中念此二事唯有痛哭

十二月雪先閑上人來問疾

先閑過問病贈之詩注時雪大作

以詩寄衡山戴先生日煥

代書寄衡山戴晉元詩有松梢淺著餘冬雪之句

詩有瓜圃夕涼五古二首冬日晚照書懷五古一首歲  
早五律一首客至五律一首初夏五律二首待于禮五  
律一首先開過問病贈之五律一首冬夕五律一首徐  
合素自南來抵郡城遠訊船山代書答之尊世父闇公  
從海上卒於嶺表廿餘年矣因寓我尚爲人之歎七律  
一首五日前一夕唐如心以近詩見問病廢夜讀久矣  
卽夕口占寄意七律一首寄周令公七律一首病起連  
雨七律四首水仙七絕一首代書寄衡山戴晉元七絕  
二首七十自定稿大牆上蒿樂府一首樹中草樂府一首詠

風排律一首

分體稿

二十四年乙丑 公六十七歲

居湘西草堂春正月辛酉朔作遣懷詩

辛酉日遣懷詩其一云短燭空燒柏濁醪不餞椒歲  
華知幾日人道是今朝其三云暝氣幸霜餘留寒釀  
春雪藥力不崢嶸眉間感千擷

大凌作冰林詩

冰林詩引癸巳春作冰林近體十章亡友劉子參許  
以瑋麗子參謝世稿亦佚亡今年始春承臘萬林一  
色憶前時清思渺不相卽率爾別裁不能就泉臺問  
子參才盡否相賞無人雖拙何嫌哉

二月十九日石崖公曾次孫永續生

祁公次子字繹思號雲軒郡文學

六孫生萬生 放公五子蚤夭

舌劍韜以書寄訊賦詩答之

代書答舌劍韜詩有泚水東流嶽阜西及草輭煙柔  
一杖藜句

夏遊明谿寺留宿山僧導遊珍珠巖

宿明谿寺山僧導遊珍珠巖詩有陰壑埋光生夏寒  
句 鼓棹二集有遊珍珠巖行香子詞 珍珠巖在  
衡陽縣西百里中寬三丈許石徑盤旋而入

登西岡望南嶽諸峰

有西岡望南嶽詩

秋八月楚詞通釋十四卷成

楚詞通釋序例歲在乙丑秋社日南嶽王夫之釋  
九月劉先生輯夏歸

送劉生輯夏歸省重慶詩有玳瑁霜雲擁翠屏句  
病中勉爲從遊諸子作周易內傳

秋雨延旦曉起詩有息疴方及晨句 周易內傳跋  
歲在乙丑從遊諸子求爲解說形枯氣索暢論爲難  
於是乃於病中勉爲作傳

詩有西岡望南嶽五古一首秋雨延旦曉起有作五古  
一首雨夕夢覺就枕戲效昌黎體近夢五古一首吟已

猶不得曙再次前韻廣之五古一首紅葉五律二首代  
書答舌劍韜七律一首宿明谿寺山僧導遊珍珠巖七  
律一首秋興一首辛酉日遣懷五絕四首罌粟五絕一  
首相思子五絕一首山月歌七絕一首白雲歌七絕五  
首雜咏七絕四首又雪七絕一首送劉生輯夏歸省重  
慶七絕一首七十自定稿偶然作五古五首石門有靖康勒  
字五古一首冰林七律十首初秋七律三首驚秋七律  
一首白雀七律四首朱鷺樂府一首君馬元樂府一首  
戰城南樂府一首艾如張樂府一首聖人出樂府一首  
上邪樂府一首上之回樂府一首雉子班樂府一首翁  
離孫樂府一首思悲翁樂府一首巫山高樂府一首上



陵樂府一首芳樹樂府一首有所思樂府一首臨高臺  
樂府一首遠期樂府一首四言雜詩三首

分體稿

二十五年丙寅 公六十八歲

居湘西草堂春正月公疾未愈

早春餘雪屬目偶成詩有藥裏猶疇昔及知否韶華  
借句

公疾病熊公男公療之而愈

述病枕憶得今年病垂死得友人熊男公療之而蘇  
晦日石崖公卒年八十公扶病赴長樂鄉奔喪

文學廬原氏墓誌銘貞獻先生以丙寅正月晦日卒  
夏五月跋石崖公耐園家訓

薑齋文集耐園家訓跋柔兆攝提格之歲律中蕤賓  
中澣穀旦季弟夫之跋

六月書傳家十四戒授長孫生若

家譜傳家十四戒勿作贅壻勿以子女出繼異姓及  
爲僧道勿嫁女受財或喪子嫁婦尤不可受一絲勿  
聽鬻術人改葬勿作吏胥勿與胥隸爲婚姻勿爲訟  
者作證佐勿爲人作呈送勿作歇保勿爲鄉團之魁  
勿作屠人廚人及鬻酒食勿挾鎗弩網羅禽獸勿習  
拳勇咒術勿作師巫及鼓吹人勿立壇祀山祿跳神  
能士者士次則醫次則農工商賈各惟其力與其時  
吾不敢望復古人之風矩但得似啟禎間稍有恥者

足矣凡此所戒皆吾祖父所深鄙者若飲鸩狂蕩自  
是不幸而生此敗類然其繇來皆自不守此戒喪其  
惻隱羞惡之心始吾言之吾子孫未必能戒之抑或  
聽婦言交匪類而爲之乃家之絕續在此故不容已  
於言後有賢者引伸以立訓範尤所望而不可必者  
守此亦可以不絕吾世矣丙寅季夏薑齋七十老人  
書會刻本亦可以不絕吾世矣下有丙申季夏先人  
書授長慮墜失此紙如捐余骸骸孫男生若謹誌  
二十五字申寅  
之謠茲增正

未伏日述病枕憶得詩

述病枕憶得歲在丙寅未伏日船山述

作石崖公傳略

有爲家兄作傳略已示從子做詩

作滿江紅詞答慰

鼓棹二集有家兄傾背後諸君見慰重疊卹其衰病  
有踰量之獎含淚作此答之滿江紅詞

永興李公樸大爲石崖公作墓誌公因做公修謝以詩  
寄訊

有便江李爾雅尊人震隅先生先君同譜執友乙酉  
夫之侍先君避兵於便館其宅上爾雅方垂髫同侍  
近乃通問山中爲先兄誌墓姪做修謝因感懷寄訊  
詩 李爾雅名樸大永興人康熙辛酉舉人戊辰進  
士母老不仕家居授徒以正心誠意爲教一時宗之

冬十月敝公以哀毀成疾亟抱石崖公遺書授公乞爲訂正傳之二十一日卒於石崖公殯宮年五十有七

文學廳原氏墓誌銘其卒也啼號不絕于口閱六月而病愈哀又四月而亡哭抱遺書授余爲訂正而傳

之石崖公有詩傳合參卷舊齋文集有詩傳合參序致身錄一

卷寄題祠屋詩有致身錄在憑誰續句周易本義質四卷詩經尊序十

卷未知是否卽詩經合參春秋四傳質十二卷以上見唐鑑學案

公力疾至長樂鄉耐園治喪事從弟爾弼公時若公指日公從姪我文公君召吉從公從孫子美公輩數十人俱往弔

家譜丙寅歲寄弟姪書三兄之喪賢弟姪跋涉遠赴

隆禮致祭 寄弟姪書虎止公跋歲丙寅伯父石崖  
公七兄撫原相繼奄背先子力疾過長樂治喪事二  
叔爾弼翁七叔時若公指日公兄我文弟君召吉從  
姪子美輩數十人俱就位哭已而共慰孤姪生祁相  
爲款叙 爾弼公名良佐聘賢公次子鳳岐公孫宥  
公會孫任公元孫震公六世孫統公七世孫與公共  
八世祖能 指日公名順之星聘公子惟睿公孫廩  
公會孫與公共高祖甯 我文公名元修號則菴府  
庠生良臣公子象賢公孫鳳暘公會孫寵公元孫任  
公六世孫 君召公名應潮良蘭公子智賢公孫鳳  
翔公會孫任公六世孫 子美公名生彥號國望京

元公子心純公孫仁賢公會孫鳳翎公元孫宥公六世孫

公與弟姪輩約修族譜

寄弟姪書虎止公跋相爲款叙因之先子有修族譜之約

公歸作哀鴻賦

菴齋文集哀鴻賦注丙寅爲石崖先生作 寄姪弟

書虎止公跋先子歸而爲哀鴻賦爲哀伯父作也

家譜丙寅歲寄弟姪書

菴齋文集補遺同

三兄之喪賢弟姪

跋涉遠赴隆禮致祭固祖宗福澤所垂實賢弟姪敦睦厚道足知吾家自此昌盛無窮矣慰兄且悲且喜

言不能盡但恨客繁事冗不能相陪快談以展老夫  
欲言之懷病軀日衰後會又未知何日也愚於家族  
素未能致一情但養拙自守不敢一絲刻薄得罪先  
人今年已衰老惟有此心願家族受和平之福以貽  
子孫敢以直言爲吾宗勸戒此爾弼指日二弟居尊  
長之位所宜同心以修家教者也和睦之道勿以言  
語之失禮節之失心生芥蒂如有不是何妨面責慎  
勿藏之於心以積怨恨天下甚大天下人甚多富似  
我者貧似我者強似我者弱似我者千千萬萬尙然  
弱者不可嫉忌强者强者不可欺凌弱者何況自己  
骨肉有貧弱者當生憐念扶助安生有富强者當生



歡喜心吾家幸有此人撐持門戶譬如一人左眼生翳右眼光明右眼豈欺左眼以灰屑投其中乎又如一人右手便利左手風痺左手豈妒忌右手願其同癱瘓乎不能於千人萬人中出頭出色只尋常自己骨肉中相凌相忌只便是不成人戒之戒之從前或有些小事動閒氣如往歲到官出醜愚甚恨之願自今以後長似昨在三兄柩前和和順順骨肉相關一般一刀割斷前日不好之心聽老夫此語光明正大寬柔慈厚作一家風範幸祖宗覆庇無門戶之苦可不念哉因諸弟姪昨日厚於家庭之義深爲感慰故進愚言爾弼指曰二弟我文姪當以此徧告眾位我

文公平仁恕若有小小不平當聽其勸戒或不妨令  
攷敵兩人知之止期一切忘情一家歡聚而已縷縷  
不盡七十老人夫之白 與我文姪吾姪和藹安靜  
一家所服倡先遠涉致祭於叔兄相見之下悲喜交  
集而事冗客眾不能從容盡談爲恨恨耳一札寄眾  
位弟姪煩徧致之城中眾位看畢乃寄指曰叔愚但  
空言之吾姪日與周旋以善養人全賴涵育薰陶之  
力也前有紙數幅思攜歸書爲裁帖者混用僅覓紙  
二幅草次書呈不足爲重他日衰草荒邱如見老叔  
耳承許過我一看可撥冗作十日聚首否生前願見  
賢者也族譜事愚但能任譏次督責之勞目前興事

全在幼重幸與決商之叔夫之白 與幼重姪哀尤  
之下不能與吾姪一言聞將過我企望企望姪年漸  
老宜步步在根本上著想多謀多敗動輒召辱切戒  
切戒有公禮謝眾弟姪煩我文徧致之族譜事何如  
恐只成畫餅耳

十二月二十四日明莊烈帝暨公舅氏譚公星敬愍忌  
以詩寫悲

有小除夕寫悲是日爲烈皇聖誕先舅氏譚星敬先  
生亦以是日生括眾哀爲一章詩

詩有早春餘雪屬目偶成五律一首夏夕五律一首爲  
家兄作傳略已示從子做五律一首玩月排律一首昔

夢七律一首雨餘小步七律一首初月七律一首冬日

書懷七律一首五言絕句八首

七十自定稿

種瓜詞五古八

首柳枝詞七絕四首樂府七絕五首諾皋七絕七首便  
江李爾雅尊人震隅先生先君同譜執友乙酉夫之侍  
先君避兵於便館其宅上爾雅方垂髫同侍近乃通問  
山中爲先兄誌墓姪敞修謝因感懷寄訊七律一首小  
除夕寫悲是日爲烈皇聖誕先舅氏譚星欽先生亦以  
是日生括眾哀爲一章七律一首

分體稿

二十六年丁卯 公六十九歲

居湘西草堂春正月病益衰傷心無淚從遊者漸少

元夕獨坐詩有雙淚初春盡句

翠濤過草堂問病其二有惜別懸知伴侶稀句

二月猶病

翠濤喜雨見懷病枕賦答詩有靈雨自南來飛集東  
皋野之句 寄題翠濤新齋詩有湘西開竹館綠淨  
清溪源及欲從不能心自飛之句

石崖公次孫生郊生 敝公次子字小宋號靜菴

撰讀通鑑論

四月一日詩有韶華讀史過之句寫恨詩有雲中讀  
史千秋淚之句

六月朱王孫翠濤來問疾

翠濤過草堂問病詩其一有稻露垂珠遠望平疏風

疏雨葛衣輕及楓林攝攝消殘暑其二有銀漢未傾  
憐酒盡金風欲避倩雲圍及觀穫送君歸下濙之句  
何先生詣得來

夏日喜何詣得見過詩有苗葉梳風暑乍消句

原次  
翠濤

過草堂問  
病二首後

九月葬石崖公於逆流灣伍家埠公臨送會夕宿熊公  
男公山莊

送伯兄歸塋已夕宿男公山莊有泠泠露葉杪荒荒  
寒日影句 逆流灣在長樂鄉五都一區

過三座山遇邵陽羅公映來會葬

重過三座山與故人羅君遇詩有九月楓林葉墜斑

及故交雪涕弔漁灣之句注羅君時垂執先兄之紼  
羅君名映字若庸邵陽人 沅湘耆舊集載虎止公  
挽得我先生七絕三首注羅君名若庸邵陽耆舊年  
八十三全髮道服以終

歸宿別峰菴二如精舍劉公近魯策杖來慰

宿別峰菴劉庶僊策杖來慰時方從哭從先兄歸壟  
返詩有白髮共憐鐙影瘦之句

還草堂病自此不復出戶

已巳與我文姪書愚自長樂歸後未嘗出戶

敵公築蕉畦於草堂之側授生童經業敏公送子生蕃  
來學公與商譜事力疾成世系表稿授之

與弟姪書虎止公跋次年敬築蕉畦於草堂之側以

授生童經業姪生蕃

譜本作生陰案譜無生陰名與幼重姪書有三姪孫文字亦有

線路可望其成之語贍稿自示姪孫生蕃詩中有句

云汝年正英妙生蕃公行三幼重公子辛亥生時年十七正合亦就學八兄幼重送之先子因與兄力商

故改作蕃譜事病中爲成世系表稿授之

撰牧石公暨吳太恭人合耐墓表與敏公等合謀勒石

何公坪墓前

牧石先生暨吳太恭人合耐墓表年垂七十乃克與

敏輩勒遺緒於阡

作詩示姪孫生蕃

贍稿示姪孫生蕃詩有汝年正英妙之句

曾刻本作英少茲依



家譜

作書寄姪敏

家譜與幼重姪書

薑齋文集補遺同

無日不在病中血氣俱

盡但靈明在耳三姪孫文字亦有線路可望其成但  
所患者下筆太重則近粗俗已囑敵令教之以清秀  
爲人亦和順沈潛所不足者知事太早我家窮閑住  
一二年或可習爲蕭散莊子曰其嗜欲深者其天機  
淺一切皆是嗜欲非但聲色臭味也近草一官房世  
系覺有次第急需者別單所開祖父子孫名姪速查  
來或寫或刻總俟姪商之

詩有翠濤喜雨見懷病枕賦答五古一首冬日雜興五

古二首元夕獨坐五律一首晦夕五律一首四月一日  
五律一首秋日雜咏五律六首遣悶五律二首翠濤過  
草堂問病七律二首夏日喜何詣得見過七律一首姪  
敏五十七律二首重過三座山與故人羅君遇贈之七  
律一首宿別峰菴庶僊策杖來慰時方從哭送先兄歸  
壘返七律一首寄題翠濤新齋歌行一首倣李鄴侯天  
覆吾歌廣其意示于禮歌行一首七十自定稿讀史五古四  
首送伯兄歸塋巳夕宿男公山莊五古一首寫恨七律  
二首卽事七律七首仲冬壬辰云是長至七律一首爲  
誰七絕四首安成歐陽喜翁翦先師黃門公弟也守志  
約居惠問遙獎於大裘之年馳情寄壽述往永懷示孤

貞之有自也爲得十七韻排律一首北風行樂府一首  
分體示姪孫生蕃五古一首 薑齋詩牘稿

二十七年戊辰 公七十歲

居湘西草堂春正月石崖公門人羅先生桐侯來慰問  
公以石崖公遺稿授之

羅桐侯受業先兄存沒依軫倍於餘子春初過慰衰  
老愴然酬贈詩有一卷申公詩說在憑君珍重護秦  
煙之句

致公於蕉畦授生童經業

有敵築土室授童子讀題曰蕉畦口占示之詩

五月南窗漫記成初五日爲之記

南窗漫記引戊辰天中日南窗記

石崖公孫祁以耐園爲石崖公祠已卯奉主入祀公以聯一詩二寄題

寄題先兄祠屋詩注戊辰五月己卯祁孫奉主入祠祠舊耐園也 與弟姪書虎止公跋次年姪祁爲先伯父立祠堂於長樂之石仙嶺先子係之聯云門外黃鸝題碧草他生杜宇喚春歸已又寄二詩其末聯云致身錄在憑誰讀爐火香銷亦等閒

秋作霜賦

薑齋文集霜賦題注戊辰

以詩送朱王孫翠濤下武昌省明昭王暨諸故侯園墓

有翠濤將下武昌恭省昭王泊諸故侯園墓蠅書留  
別因感愴贈送詩

爲譚公玉卿孫書扇

崇禎癸未賊購捕峻亟先母舅玉卿譚翁以死誓脫  
某兄弟於虎吻謝世以來仰懷悲哽者三十餘年翁  
孫以扇索敏姪書字綴爲哀吟代書苦不能請先兄  
俯和益以老淚淫淫承睫不止詩有楓林落葉嶽雲  
寒之句

弔別峰菴二如表長老以詩

別峰菴二如表長老類知予者對眾大言天下無和  
嶠之癖者唯船山一漢魏不克任而表師志趣於此

徵矣就彼法中得坐脫其宜也詩以弔之有句云秋  
山葉落冷孤籐

撰武夷公暨譚太孺人合葬墓誌冬刻石藏岳阡隧前  
武夷先生暨譚太孺人合葬墓誌有明徵士武夷先  
生暨配譚太孺人先後合葬於此閭三十七年冢子  
介之已卒不孝季男夫之年七十矣邁屯永世將拂  
螻蟻迺克誌焉 武夷府君行狀記戊辰冬始藏誌  
石於岳阡之隧前

家譜將成族人有詆爲淆亂名分者公恚而止

與弟姪書虎止公跋譜將成矣族人有以淆亂名分  
相牴牾者先子恚而中止

以書寄爾弼公

家譜與爾弼弟書

薑齋文集補遺同

長樂一別遂久不得一

信往來人言賢弟近况甚好足爲欣慰而愚日衰一日經年不能出戶未知更有相會之日否也譜議不成族中人錯亂至此但堪一歎賢弟年富力强秉心剛直至公至正教子姪輩亦安靜守分和睦不爭是所望也

編七十自定稿並序

七十自定稿序戊辰歲杪戊辰日草堂自記

詩有始夏五古一首詠歸燕五古一首小步五律一首燕五律一首夏夕五律一首落日五律一首社前一日

雪七律一首二十四日又雪七律一首羅桐侯受業先  
兄存沒依軫倍于餘子春初過慰衰老愴然酬贈七律  
一首寄題先兄祠屋七律二首崇禎癸未賊購捕峻亟  
先母舅玉卿譚翁以死誓脫某兄弟於虎吻謝世以來  
仰懷悲哽者三十餘年翁孫以扇索敏姪書字綴爲哀  
吟代書苦不能請先兄俯和益以老淚盈盈承睫不止  
七律一首別峰菴二如表長老類知予者對眾大言天  
下無和嶠之癖者唯船山一漢魏不克任而表師志趣  
於此徵矣就彼法中得坐脫其宜也詩以弔之七律一  
首冬山卽事七律四首敵築土室授童子讀題曰蕉畦  
口占示之五絕四首

七十自  
定稿

感懷五古一首孟冬書懷



五古四首翠濤將下武昌恭省昭王泊諸故侯園墓馳  
書留別因感愴贈送五古一首偶作七律一首野田黃  
雀行樂府一首烏棲曲樂府二首紹古雞鳴歌樂府一  
首 分體稿

二十八年己巳 公七十一歲

居湘西草堂衰病

識小錄序稱船山病叟 與我文姪書衰病老人更  
能得幾三歲通一字於左右也

以書寄我文公

家譜與我文姪書

舊齋文集  
補遺同

與吾姪別遂已三易歲

矣衰病老人更能得幾三歲通一字於左右也前云

欲枉步過我作數日談甚爲願望想世局艱難家累  
煩冗不能如願愚自長樂歸後未嘗出戶馳情遙念  
但作夢想耳讀書教子是居家長久之要道吾姪以  
甯靜之姿修此甚爲易易每戒兩兒令以吾姪爲法  
躡等高遠不如近守規範家眾人各有心淡然無求  
則人自有感化耳又書古人云讀書須要識字一字  
爲萬字之本識得此字六經總括在內一字者何孝  
是也如木有根萬紫千紅迎風笑日駘蕩春光纍垂  
秋實都從此發去怡情下氣培植德本願吾宗英勉  
之又書杜陵有句云吾宗秀孫子質樸古人風世何  
有今古此心一定羲皇懷葛凝目卽在明珠良玉萬

年不改其光輝民動如煙我靜如鏡空花奪目驚波  
蕩魄一眼覩破置身豈在三季下哉

秋七月手錄武夷公暨譚太孺人行狀各記其後藏之  
以遺子孫

薑齋文集補遺武夷府君行狀記哀哉不孝兄弟之  
罪通於天也鮮民纍恥之季正故園天崩之日伏念  
先君子履道之貞表章無託忍死窮山屬目靡騁亦  
俟有日者獲從當世之君子遊以紀幽光而待之三  
十七年矣昔之孺子今已衰朽介之乃泣命夫之曰  
以介之幸而事親較夙也髣髴先君子可見可知之  
應跡視爾差詳焉而先君子嘗以記序之學詔孺子

幾可以言而不溢也爾其如吾言以狀雖無可告語而函之幽谷延望於身後或有埃也不然吾與爾旦夕下拂螻蟻追悔其將何及夫之泣血稽首受命謹狀如右而墓中片石則將翹首四顧不忍絕望閱四季丙寅介之復侍先君於幽壤夫之歆孤衰老痼疾弗赦於鬼神終無可望於人間迺戒介之之子敞以愚樸略誌而登之石未幾敞以哭父死戊辰冬始葬誌石於岳阡之隧前石有定制工無善巧管窺既詘約言益窮唯茲一狀稍有倫次增贅表末倘澤不永斬傳於後嗣尙知先世全生全歸以道傳家者如此雖德自不孝兄弟而衰而戰戰栗栗日恐陷墜固先

君子明昭型戒臨愚昧以鞭撻其蹇驚也已巳孟秋  
上弦夫之手錄皆季七十有一 薑齋文集補遺譚  
太孺人行狀記已巳孟秋夫之錄凡我子孫非甚不  
肖尙謹藏之

識小錄成

識小錄序已巳秋船山病寔王夫之錄

九月劉先生思肯來訪爲公再寫小照

野史劉生惜十年之別來訪山中爲寫衰容賦贈詩  
其一有雲橫脈脈雁當樓其二有雁影自宜霜月暗  
句

公自題小照

鼓棹二集有劉思肯爲余寫小像雖不盡肖聊爲題  
之鷓鴣天詞云把鏡相看認不來問人云此是薑齋  
龜於朽後隨人卜瘳未圓時莫浪猜誰筆仗此形骸  
閑愁輸汝兩眉開鉛華未落君還在我自從天乞活  
埋家譜有自題影贊念奴嬌詞孤鐙無賴向頽牆  
破壁爲余出醜秋水蜻蜓無著處全現敗荷衰柳畫  
裏圈叉圖中墨白欲說元無有祇應笑我杜鵑啼到  
春後當日落魄蒼梧雲暗天低準擬藏衰朽斷嶺斜  
陽枯樹底更與行監坐守句撮指天霜絲拂項阜帽  
仍黏首問君去日有人還似君否

案二詞前詞語意激烈似往年作後

詞語意曠達一派衰狀必末年作然行述  
僅錄前作日自題遺像云云故並錄於此

偏沅撫院鄭公端屬衡州府知府崔公鳴鶯餽帛栗請  
見公受粟返帛以疾辭不見

潘撰傳吳逆既平我大中丞鄭公端聞而嘉之屬郡  
守崔某餽帛栗請見先生以病辭受其栗返其帛未  
幾卒於船山 湖南通志職官表序偏沅巡撫駐沅  
州偏橋鎮康熙三年移駐長沙府職官表巡撫鄭端  
直隸進士康熙二十八年任二十九年卸衡州府知  
府崔鳴鶯直隸任邱進士康熙二十八年任三十年  
卸

詩有庶仙片紙見訊云年過七十未爲非幸無容局促  
榮心旣佩良規因之自廣五言一首野史劉生惜十年

之別來訪山中爲寫衰容賦贈七律二首 七十自定稿

二十九年庚午 公七十二歲

居湘西草堂評選各詩文

夕堂永日緒論序閱古今人所作詩不下十萬經義亦數萬首旣乘山中孤寂之暇有所點定因論其大約如此

正月二十日序夕堂永日緒論

夕堂永日緒論序庚午補天穿日船山老人序

六月二十日致公元配劉孺人卒

致公繼娶李氏康熙四十八年生子生荃

康熙三十年辛未 公七十三歲



居湘西草堂公久病喘嗽吟誦不輟

行述年七十三久病喘嗽而吟誦不輟

秋九月作船山記

船山記辛未深秋記

三十一年壬申 公七十四歲

居湘西草堂正月初一日公衣冠謁祖初二日清晨起坐不憚指手錄武夷公行狀墓銘付長孫生若曰汝慎藏之謂子敬曰勿爲吾私立謚也良久命整衾時方辰遂就簀正衾甫畢屆午時公卒年七十有四

家譜康熙三十一年壬申正月初二日午時沒 行述次年元旦尙衣冠謁家廟二日清晨起坐不憚指

先祖徵君行狀墓銘付長孫生若曰汝慎藏之謂敵  
曰勿爲吾立私謚也良久命整衾時方辰遂就簀正  
衾甫畢而逝享壽七十有四

葬衡陽金蘭鄉高節里大羅山繼配鄭孺人墓左首丑  
趾未遵用自題墓碑曰有明遺臣行人王夫之字而農  
葬於此其左則繼配襄陽鄭氏之所祔也銘曰抱劉越  
石之孤憤而命無從致希張橫渠之正學而力不能企  
幸全歸於茲邱固銜恤以永世

薑齋文集補遺自題墓石有明遺臣行人王夫之字  
而農葬於此其左則其繼配襄陽鄭孺人之所祔也  
自爲銘曰抱劉越石之孤憤而命無從致希張橫渠

之正學而力不能企幸全歸於茲邱固銜恤以永世  
又墓石可不作徇汝兄弟爲之止此不可增損一字  
行狀原爲請誌銘而作既有銘不可贅若汝兄弟能  
老而好學可不以譽我者毀我數十年略記以示後  
人可耳勿庸問世也背此者自昧其心 行述其銘  
末句云幸全歸於茲邱固銜恤以永世 潘撰傳自  
題其墓曰明遺臣王夫之之墓

公著書凡百餘種

家語公節略前後著書百餘種 又蒙之鴻撰蕉畦  
先生傳略其後修葺草堂奉遺書付劔剛梓以行世  
者正蒙諸書十餘種雖於船山太先生之著述僅刊

十一可與善讀者窺正學一班

其著錄有名者凡經類二十四種周易內傳六卷發例

一卷周易大象解一卷周易稗疏一卷周易考異一卷

周易外傳七卷書經稗疏四卷尚書考異一卷未刻尚書

引義一卷詩經稗疏一卷詩經攷異一篇叶韻辨一篇

詩廣傳五卷禮記章句四十九卷春秋家說三卷春秋

稗疏二卷春秋世論五卷續春秋左氏博議二卷四書

訓義三十八卷曾未刻讀四書大全說十卷四書稗疏一

卷四書考異一卷四書集成批解未刻無四書詳解佚

數說文廣義三卷凡史類五種讀通鑑論三十卷宋論

十五卷永歷實錄二十六卷卷十蓮峰志五卷大行錄

佚無卷數凡子類十八種老子衍一卷莊子解三十三卷莊

子通一卷呂覽釋佚無卷數淮南子注未刻無卷數張子正蒙注

九卷近思錄釋佚無卷數思問錄內編一卷思問錄外編一

卷俟解一卷噩夢一卷黃書一卷識小錄一卷搔首問

卷佚無卷數龍源夜話續刊本不全愚鼓詞一卷相宗絡索八卷三

藏法師八識規矩論贊佚無卷數凡集類四十一種楚詞通

釋十四卷夕堂永日八代文選評未刻無卷數夕堂永日八

代詩選評六卷未刻夕堂永日四唐詩選評七卷未刻夕堂

永日明詩選評七卷未刻李詩評未刻無卷數杜詩評未刻無卷數

劉復愚集評未刻無卷數詞選一卷未刻薑齋文集十卷薑齋

文集補遺二卷南窗漫記一卷南窗外記一卷未刻漱齋

園初集

佚無  
卷數

買薇稿

佚無  
卷數

憶得一卷嶽餘集一卷落花

詩一卷悲憤詩一卷

佚

遣興詩一卷梅花百詠詩一卷

洞庭秋一卷雁字詩一卷薑齋詩編年稿一卷柳岸吟

一卷桃花詩一卷

佚

五十自定稿一卷六十自定稿一

卷分體稿四卷薑齋詩賸稿一卷仿體詩一卷詩譯一

卷瀟湘怨詞一卷鼓棹初集一卷鼓棹二集一卷夕堂

永日緒論內編一卷夕堂永日緒論外編一卷船山經

義一卷船山制義

佚無  
卷數

龍舟會雜劇二卷公生平筆札

多取給於故友及門人書成因以授之藏於家者無幾

焉越十二年癸未宜興潘公宗洛提督湖廣學政延虎

止公入幕與儲六雅諸先生襄校事

潘撰傳故曰虎止  
游於吾門蒙撰蕉

睦先生傳略衡文之旌幣屢招惟與宜興潘太史作兩載周旋一時共事者儲六雅諸先生傾蓋訂道義之交  
潘公宗洛得見公著思問錄正蒙注莊子解楚辭通釋  
諸書潘撰傳余所得見於敵者思問錄越二年乙酉潘正蒙注莊子解楚辭通釋而已  
公將爲公傳促虎止公作行述行述蒙太風悉其梗概傳史之采風  
成潘公貽之史館以稿授虎止公潘撰家譜序余爲船以稿授其嗣王生虎止末云時康熙四十又二年丁亥有四年歲在旃蒙作語修元月在生明  
同郡紳耆呈請入祀鄉賢祠偏沅撫院趙公申喬據奏  
奉

旨報可乾隆三十九年

詔開四庫書館搜采遺書公所著周易稗疏周易考異書  
經稗疏書經引義詩經稗疏詩經考異叶韻辨春秋稗

疏春秋家說均得進呈奉

旨列入四庫其載在

欽定四書全書總目提要者爲周易稗疏一卷附考異一卷書經稗疏四卷詩經稗疏四卷附考異一篇叶韻辨一篇春秋稗疏二卷載在

欽定四庫全書總目經部書類存目者爲尙書引義六卷載在

欽定四庫全書總目經部春秋類存目者爲春秋家說三卷載在

欽定四庫全書簡明目錄者爲周易稗疏四卷附考異一卷書經稗疏四卷詩經稗疏四卷春秋稗疏二卷並經



奉

旨以儒林於

國史館立傳

鄧顯鶴著述目錄書後歿後十四年遺書散佚其子敵始爲之收輯推闡上之督學宜興

潘先生因緣得上史館立傳儒林今以四庫書目及國史凡例本傳証之便知其誤

公書始刊於公子敵門人及姻友之有力者凡數種

見湘

西草其後增刻周易大象解春秋世論四書稗疏四書

堂記其後增刻周易大象解春秋世論四書稗疏四書

考異老子衍莊子解楚詞通釋正蒙注思問錄文集詩

集詩餘詩話凡十餘種見前引焦畦先生傳畧及後附著述目錄

道光初元

公六世孫承佺搜輯公遺書藏於家庚子公七世從孫

世全刻周易內傳周易大象解周易稗疏周易考異周

易外傳書經稗疏尙書引義詩經稗疏詩經考異詩廣

傳春秋稗疏春秋家說春秋世論續春秋左氏傳博議  
禮記章句四書訓義四書稗疏四書考異凡十八種於  
湘潭咸豐初板燬於兵同治四年曾文正公國藩與弟  
忠襄公國荃重刻前十七種於金陵以四書訓義爲口  
授講章從緩刻增周易發例讀四書大全說四書稗疏  
說文廣義讀通鑑論宋論永厯實錄蓮峯志老子衍莊  
子解莊子通張子正蒙注思問錄內篇思問錄外篇俟  
解噩癘黃書識小錄愚鼓辭楚詞通釋薑齋文集南窗  
漫記嶽餘集落花詩遣興詩梅花百詠詩洞庭秋雁字  
詩柳岸吟五十自定稿六十自定稿七十自定稿薑齋  
詩賸稿仿體詩詩譯瀟湘怨詞鼓棹初集鼓棹二集夕

堂永日緒論內編夕堂永日緒論外編船山經義龍舟  
雜劇共五十九種光緒四年衡郡士紳遵學政朱公道  
然前諭創建船山書院於南城外十年彭剛直公玉麟  
改建船山書院於東洲曾忠襄公以家藏遺書刻板歸  
之書院十一年彭剛直公奏

聞咨部並奏改南城書院爲船山祠奉公栗主請

旨飭有司春秋致祭奉

旨報可十三年夏於書院補刻龍源夜話憶得薑齋文集

補遺分體稿編年稿凡五種公子四勿藥

早逝放勿慕

敵明經候選訓導孫入夏

早逝

生若歲貢生生茲生蒼邑

庠生冊名文園生蘧邑庠生冊名大樹生萬

早逝

敵公生

生范生荃邑廩生敵公生曾孫十九永緯永絺生若公  
生永綬永紱永緇永紓永繹生茲公生永榮永經早逝永  
組早逝生蒼公生永纁永績永緇永紉永縵早逝永緘生蓮  
公生永紱永縵生范公生永紉生范公子生荃公撫元孫三  
十九嘉珠嘉瑜嘉瑛永緯公生嘉琦嘉璧早逝嘉珙早逝嘉  
瑄永絺公生嘉松嘉枋永綬公生嘉皆永紱公生嘉榮  
嘉杓永緇公生嘉柳嘉梧嘉東永緇公生嘉懷嘉榮永  
紓公生嘉遠嘉珽永榮公生嘉訓嘉詠嘉誥永纁公生  
嘉試永纁公子永績公撫嘉詒嘉誕嘉諭永緇公生嘉詢嘉  
誦嘉詵永紉公生嘉善永緘公生嘉繁嘉侔永紱公生  
嘉琳嘉璇嘉欽嘉隴永縵公生嘉昱嘉昶嘉昇永紉公

生六世孫三十二承焯嘉瑒公生承燦承熾嘉璠公生

承灼嘉瑛公生承中嘉琦公生承譜早逝承選嘉枋公生

承潏嘉皆公生承目承釧承雨嘉榮公生承烈承越嘉

遠公生承熈承熾承休承廣嘉珽公生承佺按公遺書備盡心力

嘉訓公生承俸承俊嘉誥公生承峯承熙承洛嘉諭公

生承佔承供承崑嘉詢公生承琰承殷嘉誦公生承躬

嘉善公生承器嘉臚公生承規早逝承現嘉昇公生七世

孫四十一世吉世崢早逝承焯公生世龍世亮世澤世求

承中公生世砮承選公生世開世閔世閔世閔世閔承

潏公生世抃世持世援世摶世拴承烈公生世牒世宗

承廣公生世鴻早逝世熊世丞世聚承佺公生世習世諷

世薦世標承俊公生世珏世琥承峯公生世玠世珣世

玠世琛承熙公生世喟承洛公生世迈世逮承佔公生

世邁世連世進世遇世迨承崑公生八世孫五十二德

馴

早逝德揚

早逝德祖

德新

德春

世吉

公生德貴

德盛

德壽

德喜世龍公生德林德柏世亮公生德華德富德佳世

澤公生德壯德意德仁

早逝世開

公生德佑

世間公子

世閔

公

撫德求世聞公生德棬

世間公子

世扈

公撫德楨

世持

公生

德楹

早逝德材

德有

世挂

公生德惠

早逝德恩

早逝德志

德忠

世熊公生德苾德念世丞公生德意世聚公生德喜德

五世習公生德耕德洋

早逝德興

德財

德發

德裕

世福

公

生德知德善世標公生德凌德雲德園德洸德蘭世迈

公生德望德東德漳德佳世逮公生德定世連公生德  
呈世逮公生九世孫十六傳慧傳志傳禮德貴生傳智  
德盛生傳可德柏子德林撫傳思德柏生傳送傳桂德州  
生傳益傳監傳盛德意生傳芳德忠子德志撫傳芝德忠  
生傳芷德芯生傳高德耕生傳祥德東生十四孫勳高

序 原題船山遺書序

王船山先生遺書同治四年十月刻竣凡三百二十二卷  
國藩校閱者禮記章句四十九卷張子正蒙注九卷讀通  
鑑論三十卷宋論十五卷四書易詩春秋諸經稗疏考異  
十四卷訂正謬脫百七十餘事軍中鮮暇不克細披全編  
乃爲序曰昔仲尼好語求仁而雅言執禮孟氏亦仁禮並  
稱蓋聖王所以平物我之情而息天下之事內之莫外於  
仁外之莫急於禮自孔孟在時老莊已鄙棄禮義楊墨之  
指不同而同於賊仁厥後眾流歧出載籍焚燒微言中絕  
人紀紊焉漢儒掇拾遺經小戴氏乃作記以存禮於什一  
又千餘年宋儒遠承陸緒橫渠張氏乃作正蒙以討論爲



仁之方船山先生注正蒙數萬言注禮記數十萬言幽以究民物之同原顯以綱維萬事弭世亂於未形其於古者明體達用盈科後進之旨往往近之先生名夫之字而農以崇禎十五年舉於鄉目覩是時朝政刻覈無親而士大夫又馳驚聲氣東林復社之徒樹黨伐仇積俗日敝故其書中黜申韓之術嫉明黨之風長言三歎而未有已既一仕桂藩爲行人司行人知事終不可爲乃匿迹永郴衡邵之閒終老於湘西之石船山

聖清大定訪求隱逸鴻博之士次第登進雖顧亭林李二曲輩之艱貞徵聘尙不絕於廬獨先生終閤固藏邈焉無與平生痛詆黨人標榜之習不欲身隱而文著來反唇之

訕笑用是其身長遯其名寂寂其學亦竟不顯於世荒山  
敝榻終歲孳孳以求所謂育物之仁經邦之禮窮探極論  
千變而不離其宗曠百世不見知而無所於悔先生歿後  
巨儒迭興或攻良知捷獲之說或辨易圖之鑿或詳考古  
物訓詁音韻正詩集傳之疏或修補三禮時享之儀號爲  
卓絕先生皆已發之於前與後賢若合符契雖其著述太  
繁醇駁互見然固可謂博文約禮命世獨立之君子已道  
光十九年先生裔孫世全始刊刻百五十卷新化鄧顯鶴  
湘皋實主其事湘潭歐陽兆熊曉晴贊成之咸豐四年寇  
犯湘潭板毀於火同治初元吾弟國荃乃謀重刻而增益  
百七十二卷仍以歐陽君董其役南匯張文虎嘯山儀徵

劉毓崧伯山等分任校讐凡局於安慶藏事於金陵先生之書於是粗備後之學者有能秉心敬恕綜貫本末將亦不釋乎此也曾國藩序

傳家譜原題船山先生傳

船山先生姓王氏諱夫之字而農別號薑齋故明之遺臣我

朝之逸民也明既亡先生隱於湘西蒸左之石船山學者

稱船山先生云其先世本揚州之高郵人明永樂初官衡

州衛遂爲衡州之衡陽人世以軍功顯及武夷公曾刻本無公字

始以文學知名中天啟辛酉副榜先生卽武夷公之季子

也先生穎悟過人讀書十行俱下一字不遺年二十四與

兄介之同應崇禎家譜作正壬午科湖廣鄉試俱獲雋焉以道

梗不赴會試越明年癸未流賊張獻忠陷衡州紳士降者

以僞官官之不降者縛而投諸湘水先生走匿南嶽雙髻

峰下賊執質其父以招之先生自刺肢體創甚昇往易父

賊見其創也

曾刻本有亦字

免之父子俱得脫復走匿雙髻峰下

築室名續夢菴聊蔽風雨

曾刻本無以上十字

甲申闖賊破北京明

懷宗殉社稷先生聞之涕泣不食者數日作悲憤詩乙酉我師下南京當是時我

朝旣得兩京天下大勢雲集響應而有

曾刻本有故字

明之藩封庶

孽奔竄於湖湘滇黔粵閩間者往往始稱監國繼假位號

以恢復爲名先生少遭喪亂未見柄用及乎

曾刻本無乎字

明之亡

也顧念累朝養士之恩痛憫宗社覆亡之禍誠知時勢已

去獨慨然出而圖之奮不顧身其志亦

曾刻本無亦字

可悲也

刻

本有明藩有

曾刻本無有字

稱隆武年號者使其督師何騰蛟屯

湖南制相堵

允

家譜作磨

錫屯湖北楚省兵燹塞野加以大旱

赤地千里而逆闖李自成既斃於九宮山餘黨降者號爲

忠貞營蹂躪潛漢有岌業之勢堵何兩公措置無術而又

不相能先生憂其將敗亟走湘陰上書於司馬章曠指畫

兵食請調和南北以防潰變章司馬報曰本無異同不必

過慮先生默而退卒之賊勢猖獗司馬以憂憤卒堵何兩

公邁閔凶而勢不可爲矣丁亥我師下湖南先生時丁父

艱營葬畢西走桂林大學士瞿式耜特疏薦先生先生請

終制旣服闋歎曰此非嚴光高蹈時也卽起就行人司行

人是時粵中國命所係則瞿式耜與其少傅嚴起恆而姦

邪巨魁則內閣王化澄悍帥陳邦傳內豎夏國祥也桂藩

駐肇慶紀綱大壞給諫金堡丁時魁劉湘客袁彭年蒙正發志在振刷王化澄等害之目爲五虎交煽中宮逮獄將置之死先生約中舍管嗣裘與俱告嚴起恆曰諸君棄墳墓捐妻子從王於刀劍之中而黨人殺之則志士解體雖欲效趙氏之亡明白慷慨誰與共之者起恆感其言爲力請於廷化澄之黨參起恆先生亦三上疏參化澄結奸誤國化澄恚甚必欲殺之其黨競致力焉會有降帥高必正者救之得不死亦不往謝也返桂林復依瞿式耜聞母病閒道歸衡至則母已歿其後瞿式耜殉節於桂林嚴起恆受害於南甯先生知勢愈不可爲遂決計林泉矣初桂藩議封孫可望爲秦王起恆力阻之可望戕起恆專執威柄

越數年可望分李定國入粵遂入衡招先生先生不往作  
章靈賦王寅聞緬甸之變明之藩封庶孽稱監國假位號  
者於是乎殄盡先生遂浪遊於浯溪郴州耒陽晉甯漣邵  
之間凡所至期月人士慕從者眾輒辭去最後歸於衡刻

本無於衡二字

游石船山以其地瘠而僻遂自嶽陰遷焉築土室

名曰湘西草堂

曾刻本觀生居

晨夕著書蕭然自得作

曾刻本有讀字四

書大全說周易內傳外傳大象解詩廣傳尚書引義春秋  
世論家說左氏傳續博議禮記章句並諸經稗疏各若干  
卷又作讀通鑑論三十卷宋論十五卷以上下古今興亡  
得失之故制作輕重倚伏之原又謂張子之學切實高明  
作正蒙釋義一卷

曾刻本無一卷二字

與前

曾刻本作又作

思問錄內外編



曾刻互相發明以闡天人性命之旨別理學真僞之微又  
作篇以文章莫妙於南華詞賦莫高於屈宋故於莊騷尤流連  
往復作莊子解莊子通楚詞通釋又著搔首問俟解噩夢  
各種及自定詩集評選古今詩夕堂永日緒論注釋老子  
呂覽淮南各若干卷自明統絕祀先生著書凡四十年而  
終先生之未沒也盛名爲湖南之冠戊午春吳逆僭號於  
衡曾刻本僞僚有以勸進表薦曾刻先生者先生曰某本  
亡國遺臣曾刻本有扶傾無鼎革作國破以來久逋於世  
偷活人間不祥極矣今汝亦安用此不祥之人爲遂逃之  
深山作祓禊賦吳逆旣平我大中丞鄧公端聞而嘉之屬  
郡守崔某餽粟帛請見先生以病辭受其粟返其帛未幾

卒於石船山葬於大羅

曾刻本樂

山高節里自題其墓曰明遺

臣王夫之之墓自銘曰抱劉越石之孤忠而命無從致希張橫渠之正學而力不能企幸全歸於茲邱固銜恤以永世嗚呼先生之志可悲也先生子二人曰旼曰敵敵字虎止游於吾門蓋能紹先生之家學者余不及見先生慕先生之高節欲盡讀其書敵曰先人家貧筆札多取給於故友及門人書成因以授之藏於家者無幾焉余所得見於敵者思問錄正蒙注莊子衍曾刻本作解楚詞通釋而已贊曰明之支藩播遷海澨先生非不知其無能爲也猶閒關跋涉發讜論攻愼邪終擯不用隱而著書其志有足悲者以先生之才際我

朝之興改而圖仕何患不達

曾刻本有而字

乃終老於船山此所

謂前明之遺臣者乎及三桂之亂不屑勸進抑又可謂我

朝之貞士也哉鄭中丞聞之而加禮焉良

曾刻本無良字

有以也

湖廣學政宜興潘宗洛撰

家譜此上十字在

前題船山先生傳下曾刻本於此連書康熙

己酉八月既望提督湖廣學政翰林院檢討宜興潘宗洛撰

謹案潘公撰傳曾刻本與家譜小異茲依家譜將曾

刻本異文校注其下所以資考證也家譜載撰名於

題下而不詳年月曾刻本則連書於篇末而年月與

官稱加詳未知孰爲原式茲依家譜題名移載篇末

期與編末所收曾序鄧目錄余傳唐學案體例相同

至曾刻本康熙己酉實乙酉之謄家譜潘序起云余

爲船山先生立傳貽史館未署康熙四十有四年歲  
在旃蒙作詒云云虎止公撰公行述亦云哀哉亡考  
之逝今十有四年矣其爲乙酉參考益信手民魚魯  
並附正焉 之春謹識

增錄

余傳

唐學案

船山著述目錄

[illegible]

傳

先生姓王氏名夫之字而農號薑齋先世本揚州高郵人  
明永樂初有官衡州衛者遂爲衡州衡陽人家世以軍功  
顯父字武夷始以文學知名中天啟辛酉副榜先生卽其  
季子也明旣亡隱於湘西之石船山學者稱船山先生先  
生少負儁才讀書十行俱下一字不遺年二十四與其兄  
介之同舉崇禎壬午鄉試以道梗不赴會試明年張獻忠  
陷衡州設僞官招降士紳其不屈者縛而投諸湘江先生  
走匿南嶽雙髻峰下賊執其父以爲質先生引刀自刺其  
肢體昇往易父賊見其偏創也免之父子俱得脫甲申李  
自成陷北京懷宗殉社稷先生涕泣不食者數日作悲憤

詩乙酉我師下金陵當是時我

朝旣得兩京天下雲集響應而明之藩封庶孽奔竄於湖南滇黔粵閩間者往往始稱監國旣假位號以恢復爲名先生少遭喪亂未見柄用及是顧念累朝養士深恩痛憫宗社顛覆誠知時勢萬不可爲猶且奮不顧身慨然一出而圖之明藩有稱隆武年號者使其督師何騰蛟屯湖南制相堵允錫屯湖北兩湖兵燹塞野又歲大旱時李自成死於九宮山餘黨降者號爲忠貞營尙復蹂躪潯澆間洶洶有反側之勢堵何兩人本措置無術又相持不相能先生憂其必敗也亟上書於司馬章瓚請調和南北兩軍以防潰變司馬不聽先生默而退卒之賊黨猖獗司馬以憂

憤死堵何二人遭閔凶而勢不可支矣丁亥我師下湖南先生南走桂林大學士瞿式耜疏薦先生以丁父憂請終制既服闋卽起就行人司行人是時桂藩駐肇慶國命所係則瞿式耜與其少傅嚴起恆然紀綱已大壞獨給諫金堡丁時魁劉湘客袁彭年蒙正發五人者志在振刷而內閣王化澄悍帥陳邦傳內豎夏國祥等爲姦邪巨魁深嫉此五人目爲宮庭五虎逮繫獄中將置之死先生約中舍管嗣裘走告嚴起恆曰諸君棄墳墓捐妻子壹意從王於刀劒中而黨人殺之則志士解體雖欲效趙氏之明白慷慨以亡國誰與共亡者起恆感其言力請於廷化澄黨參起恆先生亦三上疏參化澄化澄恚甚必欲殺先生會有



降帥高必正者救之得不死返桂林復依瞿式耜聞母病  
聞道歸衡至則母已歿其後瞿式耜殉節於桂林嚴起恒  
受害於南甯先生知勢愈不可爲遂決計老牖下矣壬寅  
閏緬甸亦覆沒明之藩封庶孽稱監國假位號者至此殄  
盡先生遂浪遊於浯溪郴州耒陽晉甯漣邵閒所至人士  
慕從者輒益眾先生輒辭去最後歸衡陽之石船山築土  
室名曰觀生居晨夕杜門蕭然自得乃著讀四書大全說  
周易內傳外傳大象解詩廣傳尚書引義春秋世論家說  
左氏傳續博議禮記章句並諸經稗疏各若干卷作讀通  
鑑論三十卷宋論十五卷莊子通楚辭通釋搔首問侯解  
噩夢各種又注釋老子呂覽淮南評選古今詩各若干卷

自明統絕祀先生著書凡四十年其學深博無涯涘而原本淵源尤神契正蒙一書於清虛一大之旨陰陽法象之狀往來原反之故靡不有以顯微抉幽析其奧突其自序曰謂之正蒙者養蒙以聖功之正也聖功久矣大矣而正之惟其始蒙者知之始也或疑之曰古之大學造之以詩書禮樂迪之以三德六行皆日用易知簡能之理而正蒙推極夫窮神知化達天德之蘊則疑與大學異則請釋之曰大學之教先王所以廣教天下而納之軌物使賢者卽以之上達而中人以之寡過先生不能望天下以皆聖故德其成人造其小子不强之以聖功而俟其自得非吝也抑古之爲士者秀而未離乎其樸下之無記誦詞章以取

爵祿之科次之無權謀功利苟且以就功名之術其尤正者無狂思陋測蕩天理滅彝倫而自矜獨悟如老聃浮屠之邪說以誘聰明果毅之士而生其逸獲神聖之心則但習於人倫物理之當然而性命之正自不言而喻至於東周而邪慝作矣故夫子作易而闡形而上之道以顯諸仁藏諸用而孟子推生物一本之理以極惻隱羞惡辭讓是非之所繇生故夫子曰吾十有五而志於學所志者知命耳順不踰之矩也知其然者志不及之則雖聖人未有得之於志外者也故孟子曰大匠不爲拙工改廢繩墨羿不爲拙射變其彀率宜若登天而不可使逸獲於企及也特在孟子之世楊墨雖盈天下而儒者猶不屑曲吾道以正

其邪故可引而不發以需其自得而自漢魏以降儒者無所不淫苟不挾其躍如之藏則志之搖搖者差之黍米而已背之霄壤矣此正蒙之所繇不得不異也宋自周子出而始發明聖道之所繇一出於太極陰陽人道生化之終始二程子引而伸之而實之以靜一誠敬之功然游謝之徒且歧出以趨於浮屠之蹊徑故朱子以格物窮理爲始教而櫟括學者於顯道之中乃其一再傳而後流爲雙峰勿軒諸儒逐迹躡影沈溺於訓詁故白沙起而厭棄之然而遂啟姚江王氏陽儒陰釋誣聖之邪說其究也爲刑戮之民爲閹賊之黨皆爭附焉而以充其無善無惡圓融事理之狂妄流害以相激而相成則中道不立矯枉過正有

以啟之也人之生也君子而極乎聖小人而極乎禽獸苟  
不知所以生不知所以死則爲善爲惡皆非性分之所固  
有職分之所當爲下焉者何弗蕩棄彝倫以遂其苟且私  
利之欲其稍有恥之心而厭之者則見爲寄生兩閒去來  
無準惡爲贅疣善亦弁髦生無所從而名善皆屬漚漚以  
求異於逐而不返之頑鄙乃其究也不可以終日則又必  
佚出猖狂爲無縛無礙之邪說終歸於無忌憚自非究吾  
之所始與其所終神之所化鬼之所歸效天地之正而不  
容不懼以終始惡能釋其惑而使信於學故正蒙特擢陰  
陽之故有屈伸之必然以立中道而至當百順之大經皆  
率者以從故曰率性之謂道天之外無道氣之外無神神

之外無化死不足憂而生不可罔一瞬一息一宵一晝一言一動赫然在出王游衍之中善吾伸者以善吾屈然後知聖人之存神盡性反經精義皆性所必有之良能而爲職分之所當修然可以見聞所及而限爲有不見不聞而疑其無偷用其叢然之聰明或窮大而失居或卑近而自蔽之可以希覲聖功也嗚呼張子之學上承孔孟之志下救來茲之失如皎日麗天無幽不燭聖人復起未有能易焉者也惟其門人未有殆庶者而當時鉅公耆儒如富文司馬諸公張子皆以素位隱居而末繇相爲羽翼是以其道之行曾不得與邵康節之數學相與頡頏而世之信從者寡道之誠然者不著是以不百年而陸子靜之異說興

又二百年而王伯安之邪說熾其以朱子格物道問學之  
教爭負勝者猶水勝火一盈一虛而莫適有定使張子之  
學曉然大明以正童蒙之志於始則浮屠生死之狂惑不  
折而自摧陸子靜王伯安之蕞然者亦惡能傲君子以所  
獨知而爲浮屠作率獸食人之張乎周易者天道之顯也  
性之藏也聖功之牖也陰陽動靜幽明屈伸誠有之而神  
行焉禮樂之精微存焉鬼神之化裁出焉仁義之大用興  
焉治亂吉凶生死之數準焉故夫子曰彌綸天下之道以  
崇德而廣業者也張子言無非易立天立地立人反經研  
幾精義存神以綱維之才貞生而安死則往聖之傳非張  
子其孰與歸是故正蒙者匠之繩墨也射者之彀率也雖

力之未逮養之未熟見爲登天之難不可企及而至於  
則可至焉不至於是未有能至者也養蒙以是爲聖功之  
所以自定而邪說之淫蠱不足以亂之矣故曰正蒙也戊  
午春吳逆僭號於衡僞僚有以勸進表相屬者先生曰某  
本亡國遺臣所欠一死耳今汝亦安用此不祥之人哉遂  
逃入深山作祓禊賦吳逆旣平湖南中丞鄭公端聞而嘉  
之屬郡守某餽粟帛請見先生以病辭受其粟反其帛未  
幾卒於石船山葬大樂山之高節里自題其墓曰明遺臣  
王夫之之墓自銘曰抱劉越石之孤忠而命無從致希張  
橫渠之正學而力不能企幸全歸於茲邱固銜恤以永世  
子二人放敵敵字虎止能紹其家學者先生家故貧著書



增補卷之二  
筆札多取給於故友及門人家書成因以授之不自收拾  
藏於家者蓋無幾焉

贊曰先生可謂篤信好學蒙難而能正其志者方明之亡  
先生非不知事不可爲然且窮老盡氣奔竄於荒巖絕徼  
閒發其讜論攻檢邪終擯不用而始隱伏著書其志亦可  
哀也矣若橫渠以禮爲堂以易爲室所稱四先生之學柱  
立不祧者而著正蒙一書尤窮天地之奧達性命之源反  
經精義存神達化朱子亦謂廣大精深未易窺測先生究  
察於天人之故通夫晝夜幽明之原卽是書暢演精釋與  
自著思問錄內外二篇皆本隱之顯原始要終朗然如揭  
日月至其扶樹道敎剖析數千年學術源流分合同異自

序中羅羅指掌尤可想見先生素業雖其逃名用晦遯跡  
知希從遊蓋寡而視真西山魏了翁以降姚許歐吳諸名  
儒僅僅拾雒閩之糟粕以稱理學其立志存心淺深本末  
相距何如也學使宜興潘太史宗洛稱先生爲前明之遺  
臣我

朝之貞士是固然已而其立文苑儒林之極闡微言絕學  
之傳則有待於後之推闡先生者矣余廷燦撰

一

# 學案

衡陽王先生諱夫之字而農號薑齋明崇禎舉人明亡隱於湘西蒸左之石船山學者稱船山先生云先生理究天人事通今古探道德性命之原明得喪興亡之故流連顛沛而不違其仁險阻艱難而不失其正窮居四十餘年身足以礪金石著書三百餘卷言足以名山川迹跡自甘立心恒苦寄懷彌遠見性愈真奸邪莫之能撓渠逆莫之能攝欽崎莫之能躡空乏莫之能窮先生之道可以奮乎百世矣其爲學也由關而洛而閩力砥殊途歸宿正軌觀其於大學補傳爲之衍曰經云事有終始知所先後則近道矣遞推其先則曰在格物物格而後知至而意誠以及於

天下平皆因焉是事之始而爲先所當知者明矣故以格物爲始教而爲至善之全體非朱子之言也經之意也蓋嘗論之何以謂之德行焉而得之謂也何以謂之善處焉而宜之謂也何以謂之至善皆得咸宜之謂也不行胡得不處胡宜則君子之所謂知者吾心喜怒哀樂之節萬物是非得失之幾誠明於心而不昧之謂耳非君子之有異教也人之所以爲人不能離乎君民親友以爲道則亦不能舍夫人官物曲以盡道其固然也今使絕物而始靜焉舍天下之惡而不取天下之善墮其志息其意外其身於是而洞洞焉晃晃焉若有一澄激之境置吾心而偷以安又使解析萬物求物之理而不可得窮測意念求吾心之

所據而不可得於是棄其本有疑其本無則有如去重而輕去拘而曠將與無形之虛同體而可以自矜其大斯二者乍若有所賄而可謂之覺則莊周瞿曇氏之所謂知盡此矣然而求之於身身無當也求之於天下天下無當也行焉而不得處焉而不宜則固然矣於是曰吾將不行奚不得不處奚不宜乃勢不容已而抑必與物接則又洸洋自恣未有不蹶而狂者也不然則棄君親殘支體而猶不足以充其操也雖然彼自爲說而爲君子之徒者未有以爲可與於聖人之教也有儒之駁焉者起焉有志於聖人之道而憚至善之難止也且知天下之憚其難者至眾吾與之先難而不能從則無以遂其好爲人師之私欲以收

顯名與厚實也於是取大學之教疾趨以附二氏之途以  
其恍惚空明之見名之曰此明德也此知也此致良知而  
明明德也體用一知行合善惡泯介然有覺潏然任之而  
德明於天下矣乃羅織朱子之過而以窮理格物爲其大  
罪天下之畏難苟安以希冀不勞無所忌憚而坐致聖賢  
者翕然起而從之嗚呼彼之爲師者與其繁有之徒其所  
用心吾旣知之矣若其始爲是說者修身制行之間猶不  
遠於君子而試之事功者亦成亦其早歲未惑之先嘗用  
力於講習討論之學故雖叛卽異端而所蓄猶存可以給  
其終身之用乃昧其所得力之本而疾攻之則爲誤亦甚  
矣將問之曰今子之所用以立言而制事者爲離物求覺

以後而乃知之乎抑故然已有所知而陰用之也其口雖辨而愧怍亦無以自釋矣况乎爲之徒者無其學問之積而早叛其規矩天理無存介然之覺不可恃奚怪其疾趨於淫邪而莫之救焉補傳之旨與夫子博文約禮之教千古合符精者以盡天德之深微而淺者亦不亟叛於道聖人復起不易朱子之言矣其衍中庸曰中庸大學自程子擇之禮記之中以爲聖賢傳心入德之要典迄於學宮之教取士之科與言道者之所宗雖有曲學邪說莫能違也則其爲萬世不易之常道允矣乃中庸之義自朱子時已病乎程門諸子背其師說而淫於佛老蓋此書之旨言性言天言隱皆上達之蘊奧學者非躬行而心得之則固不



知其指歸之所以在而佛老之誣性命以惑人者亦易託焉朱子章句之作一出於心得而深切著明俾異端之徒無可假借爲至嚴矣終不取未涉其域者之蓬心而一一喻之也當時及門之士得體其實於言意之表者亦寡矣數傳之後愈徇跡而忘其真於是朱門之餘裔或以鉤考文句分支配擬爲窮經之能僅資場屋射覆之用而無與於躬行心得之毫末其偏者則抑以臆測度趨入荒杳墮二氏之郭廓而不自知其爲此書之累不但於游謝侯呂之小有所疵而已也明興河東江右諸大儒旣汲汲於躬行而立言之未暇爲干祿之學者紛然雜起而亂之降及正嘉之際姚江王氏始出焉則以其所得於佛老者殆攀

是篇以爲證據其爲妄也旣莫之窮詰而其失之皎然易見者則但取經中片句雙字與彼相似者以爲文過之媒至於全書之義詳畧相因巨細畢舉一以貫之而爲天德王道之全者則茫然置之而不恤迨其徒二王錢羅之流恬不知恥而竊佛老之土苴以相附會則害愈烈而人心之壞世道之否莫不由之矣夫之不敏深悼其所爲而不屑一與之辨也故潛承朱子之正宗而爲之衍以附諸章句之下庶讀者知聖經之作朱子之術皆聖功深造體驗之實俾學者反求自得而不屑從事於文詞之末則亦不待深爲之辨而駁儒淫邪之說亦尙息乎凡此二篇今旣專行爲學者之通習而必歸之記中者蓋欲使五經之各

爲全書以見聖道之大抑以知凡戴氏所纂四十九篇皆  
大學中庸大用之所流行而不可以精粗異視也先生之  
學宗程朱於是可見矣其著述之如已刊者周易內傳十  
二卷周易外傳七卷周易大象解一卷周易稗疏二卷考  
異一卷禮記章句四十九卷春秋稗疏二卷春秋家說七  
卷春秋世論五卷續春秋左氏博議四卷四書義訓三十  
八卷四書稗疏二卷考異一卷先生通訓詰名物象數辨  
發精詳而又涉獵釋老莊列之中知其所以亂道者挾其  
伏而抵其瑕於易外傳中往往見之先生之著書也大抵  
爲人心之衰世道之遞學術之不明也汪洋浩瀚烟雨迷  
離以緜邈曠遠之詞寫沈苑隱幽之志激而不盡其欲言

婉而不失其所宜語蓋胸中之蘊蓄深而擊下之樞機密也斯其爲有道君子乎先生之兄曰介之字石子號石崖與先生同舉於鄉性至孝獻賊陷衡州執其父以購之與第百計營護乃得脫明亡匿而不出先先生卒先生爲撰傳畧其門人李樸大撰墓誌銘稱貞獻先生云著有周易本義質四卷詩經尊序十卷春秋四傳質十二卷唐鑑輯



船山著述目錄

周易內傳十二卷發例一卷 周易大象解一卷 周易

稗疏二卷舊本三卷 四庫本四卷 周易考異一卷原附稗疏後 周易

外傳七卷 書經稗疏四卷 尙書考異有目未見書 尙書

引義六卷 詩經稗疏五卷舊本二卷 四庫本四卷 詩經考異一

卷附叶韻辨 詩廣傳五卷 禮記章句四十九卷 春秋稗

疏二卷 春秋家說七卷 春秋世論五卷舊本二卷 續春

秋左氏傳博議二卷 四書訓義三十八卷又名授諸生講義

四書稗疏二卷舊本一卷 四書考異一卷 讀四書大全說

十卷 四書詳解未見 說文廣義三卷

凡經類二十二部已見二十部都一百六十四卷未見二

部無卷數

讀通鑑論三十卷

宋論十五卷

大行錄

見未

凡史類三部已見二部都四十五卷未見一部無卷數

張子正蒙注九卷

近思錄釋

見未

思問錄內篇一卷外

篇一卷

俟解一卷

噩夢一卷

呂覽釋

見未

龍源夜

話

老子衍一卷

莊子解三十三卷

莊子通

見未

愚

鼓歌一卷

相宗絡索一卷

三藏法師八識規矩論贊

凡子類十七部已見十二部都五十一卷未見五部無卷

數

楚辭通釋十四卷

薑齋文集十卷

卷一論三首傲符命一首連珠二十五首

卷二傳二首行狀二首墓誌銘四首記一首卷三序五首書後二首跋一首卷四啓一首尺牘十首卷五九昭卷六

九  
雜物贊卷七賦五首卷八賦三首卷九像贊一首  
董齋詩

集  
十卷定稿卷一五首自定稿卷二六首自定稿卷三七十首  
董齋詩

和  
梅九雁字詩卷八柳岸吟卷五落花詩卷六遺興詩卷七  
董齋詩

鼓  
棹二集卷三滿  
董齋詩話三卷稗疏後卷二夕堂永

湘  
入景詞  
憶得見未  
董齋外集四卷義卷一船山制

日  
緒論內篇卷  
見未  
董齋外集四卷義卷一船山制

三  
南應漫記  
見未  
董齋外集四卷義卷一船山制

經  
義卷三夕堂永日緒論外篇卷四龍舟會雜劇舊日又  
董齋詩

有  
買薇稿  
董齋永日緒論外篇卷四龍舟會雜劇舊日又  
董齋詩

名  
如夕堂永日八代文選十九卷八代詩選見未  
董齋詩

此  
唐詩選見未  
董齋詩

凡  
集內十部已見六部都六十三卷未見四部無卷數  
右衡陽王先生著書五十二種已見三十八種都三百二  
十三卷著錄於四庫者曰周易稗疏四卷考異一卷曰



尙書稗疏四卷曰詩稗疏四卷考異一卷曰春秋稗疏二卷凡六種存目於四庫者曰尙書引義六卷曰春秋家說三卷凡二種舊已刊者曰周易大象解一卷曰春秋世論二卷曰四書稗疏一卷考異一卷曰老子衍一卷曰莊子解三十二卷曰楚辭通釋十四卷曰正蒙注四卷曰思問錄二卷曰欬解一卷凡十種外文集詩集詩餘詩話復有數卷皆奇零不成部帙餘俱鈔本其未見者存佚不可知舊刻之本類坊刻且日久漫漶顯鶴病之嘗慨然發憤思購求先生全書精密鋟本嘉惠來學以是強聒於人無應者道光己亥寓長沙時方輯沅湘耆舊集徵求先生遺詩一日先生裔孫有居湘潭名世全者介其友歐陽君兆

熊訪余於城南旅寓以先生詩集來且具道先生六世孫承佺具藏先生各種遺書於家世全將謀壽諸梨棗余大喜過望次年春遂開雕於長沙以校讎之役屬吾邑人鄒漢勛其後二年次第刊成周易內傳十二卷周易大象解一卷周易稗疏二卷考異一卷周易外傳七卷書經稗疏四卷尚書引義六卷詩經稗疏五卷考異一卷詩廣傳五卷禮記章句四十九卷春秋稗疏二卷春秋家說七卷春秋世論五卷續春秋左氏傳博議二卷四書訓義三十八卷四書稗疏二卷考異一卷大凡十八種都百五十卷書成以全書目錄寄示顯鶴乃僭書其後曰班史有言古之儒者博學庠六藝之文六藝者王敎之典籍先聖所以明

天道正人倫致至治之成法自孔子沒而大道微七十子之徒遺言墜緒不絕如縷遭秦燔滅蕩然無存漢興收拾餘燼始立專門各抱一經私相授受亦互相嫉妬孔鄭諸儒始貫穿羣籍鑽研訓詁迄其蔽也雜於讖緯墮於支離破碎魏晉以後崇尚虛無流爲佛老學術紛歧世運榛塞聖人之道晦矣唐代義疏之作具有端緒而是非得失未折衷宋世眞儒出羣經乃有定論至於近代學者疾陋儒空談心性逸於考古遂至厭薄程朱專考求古人制度名物以爲博甚則刺取先儒刪落踏駁謬悠之論以爲異而一二次資高曠之士又往往誤於良知之說敢爲高論狂瞽一世著書愈多聖道愈蔽先生憂之生平論學以漢

儒爲門戶以宋五子爲堂奧而原本淵源尤在正蒙一書以爲張子之學上承孔孟之志下捄來茲之失如皎日麗天無幽不燭聖人復起未之能易惟其門人未有逮庶者而當時鉅公如富文司馬諸公張子皆以素位隱居末由相爲羽翼其道之行曾不得比於邵康節之數學而世之信從者寡道之誠然者不著是以不百年而異說興又不二百年而邪說熾其推本陰陽法象之狀往來原反之故反覆辯論累千百言所以歸咎上蔡象山姚江者甚峻或疑其言太過要其議論精卓踐履篤實粹然一軌於正固無以易也先生生當鼎革自以先世爲明臣存亡與共甲申後崎嶇嶺表備嘗險阻旣知事之不可爲乃退而著書

竄伏祁永漣邵山中流離困苦一歲數徙其處最後乃定  
居湘西蒸左之石船山築觀生居以終故國之戚生死不  
忘其志潔而芳其言哀以思百世下猶將聞風興起況生  
同里閨親讀其書者乎當是時海內儒碩北有容城西有  
整屋東南則崑山餘姚而亭林先生爲之魁先生刻苦似  
二曲貞晦過夏峰多聞博學志節皎然不愧顧黃兩先生  
顧諸君子肥遯自甘聲名益炳羔幣充庭干旌在野雖隱  
逸之薦鴻博之徵皆以死拒而公卿交口

天子動容其志易白其書易行先生竄身徭峒絕跡人間  
席棘飴荼聲影不出林莽門人故舊又無有一氣力者爲  
之推挽沒後十四

曾刻作  
四十謠

年遺書散佚其子敬始爲之收

輯推闡上之督學宜興潘先生因緣得上史館立傳儒林  
而其書仍湮滅不傳後生小子致不能舉其名姓可哀也  
當代經師後先生而起者無慮百十家所言皆有根柢不  
尙空談蓋經學至

本朝爲極盛矣然諸家所著有據爲新義輒爲先生所已  
言者

四庫總目於春秋稗疏曾及之以余所見尤非一事蓋未  
見其書也近時儀徵相國袁輯

國朝經解刻於廣南所收甚廣獨不及先生其他更何論  
已先生出處本末略見潘宜興儲六雅全謝山余存吾諸  
文集中顯鶴增輯楚寶文苑亦有傳不具述獨詳述先生

學業之大者著於篇使世之讀先生書者有所考焉道光  
元默攝提格之歲相月新化後學鄧顯鶴識